

WANTOK

NIUSPEPA BILONG OL PAPUA NIUGINI STRET

Ernst & Young audited/
circulation 15,177

36 pes

Namba 898

Wik i stat long Fonde Septemba 19, 1991.

40 toea

Sief i lus nau



• Sir Somare...lus

FOREN AFEAS minister, Sir Michael Somare i lus asde long resis bilong kamap olsem presiden bilong Yunaited Nesens. Wampela politisen bilong Saudi Arabia i bin winim Sir Michael wantaim planti vot tru.

Namba wan praim minista bilong Papua Niugini inap kisim tasol 47 vot namel long 155 memba bilong Yunaited Nesens. Samir Shihabi bilong Saudi Arabia i kisim 88 vot na win insait long wampela hait vot. Narapela man husat i resis tu long dispela sia em Abdalla Al-Ashtal bilong Yemen husat i kisim 20 vot tasol. Olgeta vot i bin kamap hait long bikpela haus bilong Jenerel Asembli long Nu Yok.

Yunaited Nesens i gat 159 memba, na Saudi Arabia i winim moa long 50 pesen vot pinis bilong kisim wok presiden.


Ol wokman bilong gavman long Waigani opis long Mosbi i bin kalap nogut long kain

vot em Sir Michael i kisim. Wampela man i tok, "Mipela i no ting Sir Michael ba' lus long bikpela namba olsem. Papua Niugini na Sief tu bai sem tru long dispela ya."

Nem bilong Sir Michael i bin stap antap tru long lista bilong winim sia bilong kamapa presiden bilong Yunaited Nesens. Long wanem planti kantri i bin sapotim em. Tasol taim nius bilong fainal vot i kamap, gavman bilong Papua Niugini i no inap bilip. Praim Minista Rabbie Namaliu i kisim tok save bilong dispela long Mirigini Haus long Mosbi long 5 klok asde.

Long las 4 o 5-pela mun nau, Papua Niugini i gat stongpela bilip olsem Sir Michael bai winim sia bilong kamap presiden bilong Yunaited Nesens. Olsem na Palamen i makim hap milien kina (K500,000) bilong kempen na helpim Sief long dispela taim. Tasol dispela i no kamapa tru.

Ol opisa bilong Waigani i bilip olsem toktok bilong wel i pulim planti arapela kantri long sapotim Saudi Arabia. Long wanem dispela kantri i gat planti wel tru long wol. Na dispela i kamap ples klia olsem mani bilong wel i holim vot bilong olgeta arapela kantri taim Amerika i senisim tingting na vot long narapela sait.



Sofbal sta bilong PNG • Ausait fil senta pilala bilong Papua Niugini sofbal tim, James Tovure i bin helpim long paitim gut tru bal na bringim tupela wanpilai bilong em i kam hom. Na dispela i helpim Papua Niugini long autim Guam, 4-3 na winim gol. Orait long poto, kapul wantaim narapela wanpilai i liptimapim Tovure.

INSAIT

- Planti meri Lae smokim spak brus nau...pes 2
- Gavman i no sapotim kakao bisnis...pes 3
- Kopi kopresen bai wok long 1992...pes 4



- Kwin bilong Hiri Moale...pes 4

NEKS WIK

- PNG Helt Nius

8 pes 1991
Ragbi Lig



- Intazon resis long Goroka

YU NO INAP WINIM
HILUX



**NAMBAWAN
TRU LONG
PAPUA NIUGINI**

TOYOTA

Ela Motors

PORT MORESBY 22 9400 LAE 43 3655 RABAU 92 1988 MADANG 82 2188 GOROKA 72 1844 MT HAGEN 52 1888
WEWAK 86 2255 KAVIENG 94 2132 KIMBE 93 5155 TABUBIL 58 9060 VANIMO 87 1254 PORGERA 508203

MEMBA BILONG BURNS PHILP (PNG) LIMITED

PLIS



RIPOT

MOSBI: Wanpela man husat i kilim narapela long Isten Hailans provins i stap nau long han bilong ol plis. Ripot i tok ol plisman i bin holim pasim Tota Gowage husat i gat 27 krismas long taim bilong independens de long Ela Beach.

Ripot i tok Gowage i bin kilim wanpela man long 26 Ogas, 1990. Gowage i bin pret long ol wantok bilong man i dai bai kilim em olsem na em i ranawe i kam long Mosbi. Tasol ol plisman i holim pasim em pinis na bai sasim em long kilim narapela man.

Em i kamap long Boroko distrik kot long Tunde 17 Septemba. Na kot yet bai stretim olgeta rot long harim kot bilong em long Goroka.

Ripot i tok narapela bikpela birua pasin i bin kamap long wanpela haus long Saraga strit long 6 mail. Plis i tok olsem sampela raskal man i bin brukim wanpela haus long Tunde nait na stilim ol samting em kos bilong ol inap olsem long K395.

Ripot i tok tu olsem ol dispela man i stilim wanpela pilaia bilong televisen wantaim K40.

Wankain stil pasin i kamap long Welfit Stoa long Koki. Dispela birua i kamap long Mande nait. Na planti samting em kos bilong ol inap olsem K900 i lus. Ol plisman i mekim wok painim aut yet long holim pasim ol dispela raskal man.

LAE: Plis ripot i tok i no gat wanpela trabel i bin kamap long Lae. Long taim bilong Saut Pasifik Gem, Morobe So na tu long independens aniveseri amamas long las wiken.

Ripot i tok i no gat bikpela trabel i kamap long Saut Pasifik gem. Dispela i soim olsem ol plisman i mekim gut wok bilong ol. Tasol nau yet ripot i tok planti liklik hevi i kamap insait long Lae siti yet.

Hevi olsem 5-pela pasin bilong brukim haus na stilim samting na tupela pasin bilong bagarapim ol meri. Narapela bikpela pasin bilong bagarapim meri i bin kamap long wanpela meri bilong Marawaka long Isten Hailans provins.

Ripoti i tok dispela meri i bin go long 3 mail setelman long Fraide apinun long painim ol wantok em i save stap wantaim.

Tasol ol raskal manki i lukim em wanpela na holim pasin em na bagarapim em.

Ol plisman i no holim pasim wanpela man yet long dispela birua.

Ripot i tok ol plisman i holim 4-pela man long brukim wanpela klap long Kamkumung viles. Ol plisman i mekim save long ol na kisim olgeta samting we ol i stilim long en.

Planti bilong ol dispela samting em ol katen bia tasol. Ripot i tok nau yet planti hevi bilong brukim haus na stilim ol samting i kamap bikpela gen long Lae siti na olgeta manmeri i mas lukautim gut long ol haus na ol samting bilong ol.

WEWAK: Ol plisman i mekim wok painim aut yet long dai bilong wanpela lapun man. Plis i gat bikpela bilip olsem pikinini meri bilong em i mas putim posin long kaikai na givim em.

Wok painim aut bilong plis i soim olsem pikinini meri i tanim batri bilong ka wantaim kaikai na givim long papa bilong em. Na bihain long papa i kaikai em i pilim olsem bel bilong em i pen.

Ol i kisim em i go long haus sik tasol bihain long 30 minit em i dai. Ripot i tok dispela birua i kamap long Kombikum namba tu long Drakikir eria.

Wok painim aut bilong plis i tok olsem pikinini meri i karim tripela pikinini long lapun papa bilong em yet. Tasol bihain pikinini i painim wanpela man long maritim olsem na dispela man i askim meri long kilim papa bilong em. Na em bai maritim meri ya.

Ripot i tok dispela meri i gat 25 krismas. Ol plisman i no holim pasim dispela meri yet long sasim em.

i go moa long pes 7

Namba bilong manmeri smokim spak brus go antap long Lae

YAKAM KELO i raitim

NAMBA bilong ol manmeri i kisim spak brus long Lae i wok long go antap moa long dispela yia.

Ripot i kam long Lae Distrik Kot i tok i planti manmeri i kamap long kot long kisim spak brus. Planti bilong ol dispela manmeri i bin kisim taim ol i pinis long kalabus.

Lae Distrik Kot i tok long mun Januari i kam inap nau, i gat 23 ripot olgeta bilong nau na meri kisim spak brus olgeta lain ya i stap long 17 na i go antap.

Planti lain husat i kisim sas long 6, 7 na 8-pela mun olgeta long kalabus. Liklik lain tasol i kisim sas long tripela na 4-pela mun long kalabus.

Kot i askim tu liklik lain long baim K50 long sas bilong ol. Sapos ol

i no baim bai ol i kisim hat tai na long tripela mun kalabus.

Wanpela man i stap kalabus long haus bilong em yet. Em i kisim 6-pela mun long dispela kalabus.

Lae Distrik Kot i tok planti bilong ol dispela sas i kamap long Julai na Jun bilong dispela yia.

Wantok i traim long kisim Distrik Kot Mejistret, John Numapo tasol em i

stap tupela wik aut sait wantaim SP Gems long Lae.

Ripot i tok insait long dispela olgeta sas, Distrik Kot i bin sasim tu, tupela yangpela meri pinis. Tupela meri ya em Cathy Manu na Angela Anguawe Philip. Tupela wantaim i bilong Hailans.

Cathy i bin kamap long kot long mun Me na kot i sasim em long 8-pela mun kalabus.

Angela i bin kamap long kot long mun Julai na kisim sas tu long 6-pela mun kalabus. Cathy na Angela wantaim i yangpela meri na i no marit. Tupela i no wok tu.

Ripot i tok olgeta dispela sas i stret tasol na i no gat wanpela bilong ol manmeri i kamap long kot ya i winim kot bilong ol. Kot i sasim olgeta stret.



Ol soim ol narapela • Planti singsing grup tru i bin kamap danis long Hiri Moale Festival long Mosbi long wiken. Olgeta grup i gat ol yanpela na ol lapun wantaim i bung na danis. Tasol dispela grup ol yanpela manmeri tasol i danis. Meri sindaun ya i bihainim wanpela stori tumbuna

Westen Hailans provinsal gavman bai givim dinau mani

OL liklik bisnisman na meri long Westen Hailans provins bai kisim helpim mani provinsal gavman long neks yia.

Provinsal gavman i putim dispela mani pinis long beng. Na ol liklik bisnis manmeri bai rausim mani stret long beng.

Dispela progrem tu bai sapatim olpela progrem bilong Westen Hailans Ekonomik Developmen Fan (EDF) i bin stat long dispela yia.

Insait long dispela progrem bilong, gavman i givim aut K288,000 long ol manmeri long yusim. Insait long namba wan na tu kota bilong yia, K153,980 i go aut pinis long ol manmeri.

Ripot i tok gavman i bin givim helpim long ol manmeri long ol samting bilong yusim na tu long sek mani. Dispela ol helpim na mani i go

long ol liklik manmeri husat i painim hat tru long kisim dinau mani long beng na arapela hap.

Ripot i tok dispela mani i no bilong bekim.

Moa long 210 man i bin raitim pas i kam long kisim dispela helpim mani. Gavman i redim pinis wanpela opisa long stretim ol dispela samting na bekim long ol. Insait long 210 pas i kam, provinsal gavman i bekim pinis 172 pas wantaim helpim ol i askim long en.

Ripot i tok dispela wok i bin stap long han bilong Praimeri Industri na Komes tupela yia bipo, tasol ol i no mekim gut dispela wok. Olsem na provinsal gavman yet i kisim bek na lukautim long wanpela opis bilong em.

Insait long dispela, mak bilong mani long ol manmeri i kisim em i stap long K5,000 na liklik long en em, K300.

Plis holim pinis 23 man stilim gol long Mt Kare

PLIS i holim 32 man pinis, husat i hait na painim gol long Mt Kare long las wik Trinde.

Ol wokman bilong Maunt Kare Aluviel Maning (MKAM) Ltd i komplem olsem long, samting olsem 20 man

long ples i kisim ol samting bilong pait na pretim ol wokman. Ol i ripot long dispela hevi na plis i bin holim ol.

Namel long ol lain plis i holim, i gat wanpela man husat i bin ranawe long kalabus pastaim. Ol ripot i tok tu olsem

ol lain ya i no bilong dispela hap maining i stap long en.

MKAM i gat 51 pesen sia long dispela maining na wanpela asples kampani, Maunt Kare Developmen Kompresen (MKAM) i holim 49 pesen sea.

Australia save givim K209 m long PNG wan wan yia

AUSTRALIA i save givim \$275 milien (K209m) long baset bilong PNG long wan wan yia tasol antap long dispela em i givim gen sampela moa mani antap long helpim PNG.

Dispeal mani em antap long baset em Australia i givim long mekim wok bilong stretim lo na oda long kantri.

Ol dispela mani em \$37.2 milien (K28) long Difens Kopresen Pro-

grem, \$14 milien (K10.7 m) em Australian Intanesenel Asistens Bureau (AIDAB) bilong helpim Plis Fos na narapela \$45,000 (K34,350,000) em bilong helpim ol wok bilong kot insait long kantri.

Olgeta ol dispela mani bai karamapim ol wok i kamap namel long dispela yia na 1992.

Hai Komisina bilong Australia long PNG,

Allan Taylor i tok antap long dispela, Australia bai go het long helpim PNG long sait bilong sekjurit.

Taylor i tok Australia bai givim dispela ol dispela helpim aninit long em Praim Minista bilong PNG, Rabbie Namaliu na Praim Minista bilong Australia, Bob Hawke i sainim long taim Namaliu i go raun long Australia namel long 28 Ogas na 4 Septemba.

Plis brukim ol haus long Westen Hailans

PLIS i bin brukim ol haus na ol narapela samting long tupela ples long Westen Hailans provins long las wik Sarere.

Tupela ples ya em, Kami, klostu long Kudjip haus sik na narapela long arere bilong Kudjip haus sik.

Ol man husat i lukim dispela trabel i tok ol plisman i kukim 14 haus na bagarapim ol samting kos bilong ol i stap long K40,000. Dispela i bungim tu wantaim samting olsem redio, vidio na ol pik em ol plis i kukim wantaim long paia.

Narapela ples i tok plis i bagarpim ol samting bilong ol we kos bilong ol i stap olsem K2,000. Ol i tok plis i bin paitim tripela meri na bagarapim wanpela.

Wanpela asples husat i bin stap long dispela taim i tok plis i bin kamap long ples taim wanpela pait i kamap namel long sampela man bilong Sauten Hailans. Ol i bin holim pait wantaim ol man bilong dispela ples.

Plis i kamap bihain long dispela taim bilong pait na mekim samting no gut olgeta. Ol i kamap gen na stat long brukim na kukim ol haus wantaim samting bilong ol asples.

Em i tok ol plisman husat i mekim dispela samting i mekim ol samting ya olsem ol spakman.

Namaliu amamas long lista bilong Bogenvil kibung

TOKTOK bilong stretim hevi long Bogenvil i kamap gutpela nau. I luk olsem i gat sampela gutpela rot i stap.

Praim Minista Rabbie Namaliu i tok samting i stap long lista bilong kibung long Bogenvil i gutpela tru. Em i amamas long gutpela wok em ol opisa bilong gavman na lida bilong Bogenvil i mekim long sampela kibung ol i holim pinis.

Em i tok mipela i mas bel gut na tingim tasol long dispela kibung long stretim toktok bai kamap orait. Sapos toktok i kamap gutpela, mipela i lukluk long painim gutpela amamas na samting i ken go bek gutpela gen.

Dispela kibung bai kamap long mun Oktoba.

Praim Minista i tok gavman bai i go het yet long salim ol helpim na sevis i go yet long ol manmeri bilong Bogenvil Ailan. Em bai mekim olsem yet bikos planti manmeri bilong Bogenvil i sot tru long ol sevis na helpim bilong gavman.

Long Nesenel De bilong Prea, Praim Minista i askim olgeta kristen manmeri bilong PNG long tingim dispela hevi prea bilong ol.

Gavman i no gat sapot mani bilong helpim kakao bisnis long Septemba

PNG Groa Asosiesen i kros nau olsem sampela opisa bilong Agrikalsa Dipatmen i no sapctim na karim aut wok ol bos bilong ol i tokim ol long mekim.

Presiden bilong Asosiesen, Michael Manning i tok long wanem 35 pesen sapot mani bilong gavman long kakao long dispela mun i nogat nau. Bikos long dispela as planti of kopi, kakao na kopra bisnis i lusim wok bilong ol. Dispela hevi long kakao i kisim tu kopi na kopra.

Long 1 Oktoba, prais bilong kakao bai i lusim K1200 wanpela tan bilong drai bin i kam

long K940. Gavman i katim tu K144 sapot mani bilong em pinis long dispela. Dispela prais em liklik tumas long ol groa husat i kisim K1,000 long wanpela tan long pastaim.

Long Februari, Praim Minista, Rabbie Namaliu wantaim Agrikalsa minista, Tom Pais i tok long kamapim sampela sapot wok long agrikalsa. Wanpela em long 15 pesen sapot mani.

Tasol ol i no karim aut dispela 15 pesen long karim aut long Mas bihainim ripot bilong wok painim aut long wok bisnis bilong kakao.

Mista Manning i tok planti toktok bilong ol long sapotim wok bisnis bilong kakao i no karim kaikai.

Sampela samting em ol i tok long karim aut long Kakao Industri i kamap ples kliia pinis tasol ol opisa i go pas long en i no tokaut long em yet. Manning i tok ol i pret long tokaut bikos sampela ripot no gut bilong ol bai kamaut long dispela.

Em i tok ol i pret long tokaut long sapot prais i bin stap tamblo tru long prodaksen kos. Prodaksen kos em bikpela hap mani i save kam long en.

Em i sutim tok long gavman, Fainens na Plening dipatmen na Beng bilong PNG long i no tokaut olsem long prodaksen kos i bikpela long prais.

Em i tok kantri i no inap long sapotim wok bisnis bilong kakao nau olsem na ol i wok long traim stapim ol samting em gavman i tokaut long ol i mas mekim.

Presiden i tok sapos gavman i ken painim mani long wokim SP Gems stedium na ol nupela haus na arapela samting tu, em i kem painim mani long helpim kakao industri.



•Samting bilong PNG: Em ol basket na samting bilong tumbuna, ol manmeri PNG i wokim na soim long Waigani At Senta long Sarere 9 Septemba.

Toktok bilong Bogenvil bai kamap klostu nau

TOKTOK bilong stretim hevi long Bogenvil i kamap gutpela nau. I luk olsem i gat sampela gutpela rot i stap.

Praim Minista Rabbie Namaliu i tok samting i stap long lista bilong dispela kibung long Bogenvil i gutpela tru. Em i amamas long gutpela wok em ol opisa bilong gavman na lida bilong Bogenvil i mekim long sampela kibung ol i holim pinis.

Em i tok mipela i mas bel gut na tingim tasol long dispela kibung long stretim toktok bai kamap orait. Sapos toktok i kamap gutpela, mipela i lukluk long painim gutpela amamas na samting i ken go bek gutpela gen.

Dispela kibung bai kamap long mun Oktoba.

Praim Minista i tok gavman bai i go het yet long salim ol helpim na sevis i go yet long ol manmeri bilong Bogenvil Ailan. Em bai mekim olsem yet bikos planti manmeri biong Bogenvil i sot tru long ol sevis na helpim bilong gavman.

Long Nesenel De bilong Prea, Praim Minista i askim olgeta kristen manmeri bilong PNG long tingim dispela hevi long prea bilong ol.

Ol Mosbi yut grup i bilip long K65,000 helpim

PLANTI raskol grup long Mosbi i kisim helpim mani long statim ol wok bilong ol yet.

Mausman bilong nupela Goilala Yut Atoriti, Jimmy Peter i tok long planti krismas i go pinis, no gat kain samting olsem i bin kamap long ol yangpela. Planti bilong ol i raun nabaut long rot na stilim mani na kaikai bilong stap laip.

Em i tok taim Praim Minista i bin bung wantaim olgeta yangpela manki long Miri-

gende long Sentrel provins, na dispela i helpim long bungim ol yangpela long gutpela tingting.

Gavman i bin tingim hevi bilong lo na oda long mekim dispela samting we ol yangpela i ken wok na stap stret.

Jimmy Peter i tok dispela rot ken daunim bikpela hevi bilong lo na oda nau i kamap long kantri.

Dispela Atoriti i bin wanpela bilong 13 wan wan grup bilong ol yangpela insait long Mosbi. Ol i kisim moa long

K65,000 long kirapim ol wok bilong ol yet. Wan wan ol lain raskol grup i kisim ol mani bilong ol.


Nesenel Kapitel Distrik Komisin i givim wok kontrak tu long sampela grup.

Grup bilong 9 Mail i kisim K13,000 long wokim wanpela hapwea haus, stua na banis pik.

Arapela grup em, Hetura Yut grup i kisim K8,000 long wokim bisnis pis, Hohola Menesa Grup i kisim K4,500 long baim ol samting bilong

musik na samapim ol klos, 585 6 Mail grup i kisim K2,000 long wokim tred stua, Aura Aura Yut, K3,800 long televisen na futbol projek, Evigima grup i kisim K3,000 long wokim haus kakaruk, GGB Mafia brens bilong Laloki i kisim K4,500 bilong wok egrikalsa na kakaruk projek, Kaugere yut i kisim K3,000 long planim plaua na salim na kontrak bilong pasim hul long haus kapa na 585 Morata i kisim K2,000 long wokim kakaruk projek.

Calculators



20% OFF Some Models

ALU SIGNS PTY LTD

PO BOX 7081, BOROKO PH: 25 4800 STORE: NEAR BOROKO POLICE STATION



WANTOK

NIUSPEPA BILONG OL PAPUA NIUGINI STRET

Stretim hevi long kantri pastaim

Tingting bilong Papua Niugini gavman long kisim Sir Michael Somare long resis long kamap Presiden bilong Yunaited Nesen Jenerel Esemblu i gutpela tru.

Dispela long wanem sapos Sir Michael i win bai em i kamapim nem bilong PNG long ol narapela kantri. Gavman i yusim K500,000 long kempen bilong Sir Michael. Na planti nius i kamap long lokel niuspepa, redio na TV olsem Sir Michael bai win.

Tasol nau narapela stori i kamap. Em i lus na dispela mani na hatwok bilong ol man i mekim kempen bilong Sir Michael i lus nating.

Gavman i ken yusim mani long mekim ol narapela ol narapela samting long kantri.

Namba wan samting em long helpim ol brata na susa long Bogenvil. Na namba tu em long stretim hevi bilong lo na oda long kantri.

Ai bilong ol narapela kantri i no pas long ol samting i wok long kamap long kantri. Ol kain tenis i kamap long konstitusen olsem gavman bai kilim man husat i kilim narapela na ol narapela samting.

Kopi Indastri Kopresen bai stat long lukautim wok bilong kopi long 1992

INTERIM Kopi Indastri Bod (CIB) i bin karim aut tripela bikpela wok tru taim em i tekova long olpela bod long 10 Janueri long dispela yia.

Dispela tripela wok em:

- redim ol wok long kamap bilong Kopi Indastri Kopresen (CIC);
- mekim ol wok painim aut i go insait long olpela bod memba bilong CIB; na

• toktok long kisim bek mani bilong ol groa em Panga Coffee Pty Ltd i bin yusim na i no bekim.

Interim siaman bilong CIB, Ricky Mitio i tok ol i winim pinis namba wan wok bilong ol. Palamen i tok orait pinis long CIC long kamap long kibung bilong en long 27 Ogas.

Em i tok long namba tu wok bilong ol, ol i wok long redim ol

fainel ripot nau long givim long minista bilong Agrikalsa na Laivstok, Tom Pais long lukluk long en. Na ol i go het yet long mekim namba tru wok bilong ol.

Dispela nupela CIC bai karamapim wok bilong CIB, Kopi Rises Institut (CRI) na Kopi Dvelopmen Ejensi (CDA). Tasol Mitio i askim olgeta manmeri long kopi indastri long noken tingting tumas

long dispela samting bikos CIC i no inap long tekova yet. Olgeta ol dispela grup bai go het yet long mekim wok bilong ol.

Em i tok long Septemba long dispela, interim bod bai kisim olgeta wok bilong ol dispela grup i kam insait long CIC. Namel long Oktoba na Disemba bai ol interim bot memba bai raun long olgeta provins i

save kamapim kopi long tok klia long ol groa na ol narapela lain i mekim wok bilong kopi long Mitio i tok namel long Janueri na Mas long 1992, ol groa na ol narapela lain i mekim wok bilong indastri bai stat long makim ol mausman bilong ol long kamap olsem ol daireta bilong CIC. Na long Jun, 1992 yet, nupela CIC bod i mas tekova pinis long interim bod.

Australia bai helpim PNG long lo na oda

AUSTRALIA bai givim moa helpim long Papua Niugini long mekim wok bilong sekyuriti long kantri.

Bikpela tingting i stap namba wan long dispela ol helpim em Australia bai givim em long stretim hevi bilong lo na oda long kantri.

Dispela tingting bilong Australia long helpim PNG long sait bilong sekyuriti bai kamap aninit long wanpela tok orait em Praim Minista bilong Australia, Bob Hawke na Praim Minista bilong PNG, Rabbie Namaliu i sainim long biktaun bilong Australia, Canberra long 2 Septemba.

Tok orait i bihainim bikpela tingting bilong tupela kantri wantaim olsem wok developmen bai kamap sapos i no gat hevi bilong lo na oda long kantri.

Hia em ol sampela bikpela tingting bilong agrimen:

- tupela kantri wantaim bai og het long wok

bung wantaim long lukautim wok bilong sekyuriti;

• ol wanem samting tupela kantri wantaim i laik givim long narapela i mas kam aninit long bikpela tingting olsem em bilong mekim wok bilong nesenel sekyuriti na ol narapela samting;


• tupela kantri wantaim i gat rait long tok no gat long narapela long givim samting long narapela. Taim ol i mekim dispela ol i mas tupela wantaim i mas luksave long wok bung wanem namel long ol na ol narapela kantri.

Ol lain bai karim aut ol dispela samting i mas mekim aninit long ol progrem na plen em tupela kantri wantaim i orait long en. Na ol sinia opisa bilong tupela kantri wantaim bai bung long wan wan yia na lukluk long wanem ol samting i kamap pinis long tok orait.

Tok orait pepa i no tok aut long wanem ol samting bai tupela kantri i givim namel long ol yet. Tasol hap tok i kamap long tok orait em "nesenel

sekyuriti" i tok klia long wanem samting ol i toktok long en. Em i min olsem tupela kantri wantaim bai wok bung wantaim sapos i gat trabel i kamap

namel long wanpela bilong ol wantaim ol narapela kantri. Dispela em namba wan na namba tu em long stretim ol hevi bilong lo na oda.



• Praim bilong Papua Niugini, Rabble Namallu i sekan wantaim Praim Minista bilong Australia, Bob Hawke long taim ol i sainim tok orait long Australia las 2 Septemba

Bogenvil i mas stap olsem hap bilong PNG - Hawke

PRAIM Minista bilong Australia, Bob Hawke i tok Australia i laik lukim olsem Bogenvil i mas stap yet olsem wanpela hap bilong PNG.

Hawke i tok aut long dispela taim Praim Minista bilong PNG, Rabbie Namaliu i go raun long Australia namel long 28 Ogas inap long 4 Septemba.

Hawke i tok Australia i luksave long ol hevi PNG i wok long pilim nau bikos long wanem samting i kamap long Bogenvil. Bikpela hevi

PNG i kisim em long sait bilong mani. Tasol em i tok gavman bilong PNG i strong long daunim sampela long ol dispela hevi.

Na ol i bilip olsem dispela wankain strong bilong gavman bilong PNG bai em i bihainim tu long stretim tu ol hevi long Bogenvil. Na wanem kain rot gavman bai bihainim long stretim ol hevi i mas kamapim olsem Bogenvil i stap yet olsem wanpela hap bilong PNG.

Em i tok hevi long Bogenvil bai i no inap long pinis sapos gavman i laik stretim wantaim pait. "Ol toktok bilong stretim hevi nau bai kamap gen long Bogenvil em i gutpela mak na long lukluk bilong mipela. Dispela em gutpela rot long stretim hevi.

"Mipela i bin givim sampela helpim pinis na mipela i redi tasol long givim sampela moa helpim long bihainim taim," Hawke i tok.

WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO
Telepon Namba: 25 2500
Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

BIAS LONG PALAMEN HAUS BIABIA I SALENSIM SAMPELA OL MINISTA...



NAU OL MEMBA IKROS NA TOKIM MISTA SPIKA LONG STOPIEM EM...



BAI MI SUBIM TOKTOK IGO, IGO. NA BAI OL I PILIM PEN NA BAI OL IKRAI LONG MI LONG RAUSIM DISPELA TOKTOK!!



TASOL BIABIA I GAT MOA TOKTOK...





Wanpela manki Makuraka long Isten Hailans provins i go long Goroka haus sik long lukim susa bilong em. Susa bilong em i laik karim na i go slip long wod i stap.

Em i go kamap long haus sik na bihainim lata i go long ples bilong ol meri i karim long en.

Long rot em i bungim wanpela meri i klinim ples long haus sik i stap. Meri ya i lukim man ya i wok long sekim olgeta wod i kam kamap long hap em i wok long en i stap. Olsem na em i askim man ya, "Apo, yu painim husat?" na man ya i bekim, "Mi laik painim sisa bilong mi".

Meri ya i paul na askim gen. Tasol man ya i tok em i painim sisa bilong em yet. Meri ya i no klia tru long dispela toktok bilong man ya. Tasol man ya i wok long mekim wankain toktok yet.

Olsem na meri ya i lap nogut tru na tokim ol narapela meri nes na sista i wokabaut i kam. Olgeta meri i lap nogut tru long man ya na bihain ol i helpim em i go long haus bilong ol meri i karim pikinini na em i lukim susa bilong em.

Jacob Jack
GOROKA

Wanpela taim Kanage i go long stua long baim kaikai. Dispela stoa i gat wanpela meri i save wok long en.

Meri ya i pilaim redlo long stoa na i wok long wok wantaim i stap, taim Kanage i go kamap.

I no long taim na wanpela singsing i kamap long redlo ya. Meri ya i kirap lusim tingting olgeta long sevim Kanage na wok long tromoi han bihainim musik bilong redlo ya. Em mekim longpela taim na Kanage i wet i stap.

Bel bilong Kanage i bagarap olgeta na em wet lukluk long meri ya i stap. Tasol meri ya i no stop na Kanage kirap na bikmaus long em.

"Yu laik komanda long husat? Lusim dispela komanda na sevim mi pastaim ya mona. Mi sanap longpela taim pinis na mi les ya".

Meri ya bikmaus long em na i tok, "Wanem komanda, tai kwan ndo".

Ol manmeri husat i kamap long stua ya i lap nogut tru long Kanage wantaim meri ya bikos tupela wantaim i mekim krangi toktok olgeta. Ol i kirap na tokim tupela, i wanem komanda na tai kwan ndo, samting em kon-dakta.

Yoyo Tbel
WEWAK

Wanpela man lek no gut long Goroka i save sindaun arere long stua olgeta taim. Em i save sindaun na ol manmeri bai i kam tromoi ol mani long em. Em i save mekim olsem long olgeta taim.

Wanpela taim wanpela lapun Sepik i wok-abaut i kam long dispela hap na bungim man nogut ya. Man nogut ya i lukim lapun Sepik ya tokim hapim wanpela han na singaut long em "moning".

Taim lapun Sepik i harim olsem, em i ting man nogut ya i askim mani long em olsem na em opim paus bilong em na givim 50 toea long man nogut ya.

Long narapela de, dispela lapun man Sepik i wokabaut i kam long dispela hap gen. Man nogut ya i lukim em na apim tupela han wantaim na singaut, "moning".

Taim lapun i harim olsem, bel bilong em i paia stret na i laik tromoi han long man nogut ya. Em kirap na bikmaus long man ya olsem, "asde tasol yu hapim wanpela han na singaut mani long mi, na mi givim yu 50 toea pinis. Nau yu lukim mi gen na apim tupela han long kisim amamas tru?".

Man, bel bilong lapun Sepik i kros no gut tru na i laik tromoi han long man nogut ya tasol em lusim na kamautim K1 na givim em.

Michael Chaun
RABAUL

Ol skul manki painim ples bilong skul

OL skul manki i yusim haus kalabus, sosel haus na haus bilong kaunsil olsem klasrum long Boboa insait long Westen provins.

Boboa komyuniti skul insait long Westen provins i lusim pinis ol skul manki bilong em. Dispela em bikos skul ya i olupela tru na planti samting long en i no gutpela moa.

Edukesen opisa bilong Not Flai, Mosuwo Quapo i tok ol i stapim dispela skul bikos skul i no moa gutpela. Planti samting long en i lapun pinis. Ol bai stapim skul ya inap long sampela taim bihain inap long ol samting i orait gen.

Mista Quapo i tok long Me, snek i bin kaikai wanpela skul manki na em i bin dai. Em i bin laik painim ol frut long diwai arere long skul taim snek i kaikaim em. Long dispela taim ol papamama bilong skul manki i laikim bai skul i go klostu long Boboa stesin.

Olpela skul ya i stap longwe liklik long ples balus na arapela skul tu. Ol papamama i pret bai moa snek i kaikaim ol manki yet long skul.

Ol papamama i askim skul Westen provinsal gavman Edukesen Bot long muvim dispela skul i go long narapela hap. Edukesen Bot i tok orait long dispela tasol em i tok dispela em wok bilong ol papamama long mekim.

Ol i bin yusim ol samting bilong bus na samting bilong stoa long wokim ol dispela skul na ol haus bilong ol tisa. Ol samting bin orait tasol longpela taim nau na ol samting i go lapun nambaut.

Mista Quapo i tok opis bilong em i gat planti pas i kam pulap long stretim dispela skul hariap. Tasol ol papamama na komyuniti i no mekim wanpela wok yet. Em i tok sapos no gat wanpela samting i kamap, bai ol i stapim skul ya olgeta.

Madang provins paia long independens selebresen

PLANTI ol kain kain pilai na selebresen i kamap long Madang long taim bilong namba 16 independens de selebresen.

Long dispela yia, amamas bilong independens selebresen i no kamap tasol long Madang taun olsem i save kamap long ol yia bipo.

Ol pipel bilong Rivo viles, klostu tasol long Madang taun i putim kamap kalsere de. Dispela de bilong ol i pulim planti manmeri long Madang taun i go long lukim.

Wankain selebresen i kamap long Bogia stesin long Not Kos. Membra bilong Bogia long Nesanel Palamen, Tim Ward i givim ol pipel K2,000 long kamapim dispela selebresen.

Ol yanpela i holim ol kain gem olsem soka, basketbal na volibal resis. Ward wantaim provinsal minista bilong edukesen, Teddy Tamune i stap wantaim ol pipel long dispela de.

Ailan Karkar i paia taim 12-pela soka tim i kik long Peter Yama Kap resis long independens de. Olgeta manmeri i amamas tru long kam bung wantaim na kik long lukim husat tim bai winim Yama Kap.

Plantu skul liva tumas long Papua Niugini - Sir Serei Eri

PAPUA Niugini nau i wok bihainim gutpela rot bihain long 16 yia olgeta nau em i kisim independens.

Gavana Jenerel bilong PNG, Sir Serei Eri i tokaut long dispela long namba 16 independens selebresen long Mari Boreks long Mosbi long Mande apinun.

Sir Serei i tok i no long taim nau bai PNG kisim planti mani long ol minerel long kantri

maski prais bilong ol kes krip olsem kopra, kopi, kakao na welpam i no gutpela long wol maket.

Em i tok em i lukim pinis tu olsem long sait bilong politik, planti ol lida nau i wok long bung wantaim long gutpela bilong kantri. Sir Serei i tok dispela i kamap klia long kibung bilong Palamen long Ogas we planti ol membra i sapotim gavman long tok orait long

Sindaun bilong ol pipel bag-arap long Giri long Madang

SINDAUN bilong ol pipel bilong Giri viles long Madang provins i bagarap nau bikos ol provinsal gavman na nesanel membra bilong ol i lus tingting long ol.

Wanpela lida bilong ples, Alfred Ruene i laikim provinsal membra bilong ol, Teddy Tamune long painim sampela mani hariap long stretim rot bilong ol nau bus i karampim pinis.

Ruene i tok bikos rot i bus, ol man nogut i painim isi long mekim wanem samting long ol lain i wokabaut long dispela rot. Em i tok

long las mun, ol man nogut i kilim wanpela man long dispela rot.

Plis long Bogia stesin i sapotim toktok bilong Ruene olsem dispela em i tru. Ol raskel i bin laikim dispela man wantaim sot gan.

Ruene i tok ol pipel bilong em i gat planti ol kes krop olsem kakao, kokonas na kopi long salim tasol rot i no gutpela bai ol i ken salim na kisim liklik mani.


"Mi laikim Tamune na nesanel membra bilong Bogia, Tim Ward i mas

wok bung wantaim na painim mani kwik long stretim dispela rot.

"Long hia long Giri viles, sindaun bilong mipela i bagarap bikos i no gat we bilong mekim mani long baim ol klos bilong mipela.

Ed pos bilong mipela tu i bagarap olgeta na i no gat moa marasin," Ruene i tok.

Giri viles i stap samting olsem 40 kilomita longwe long Bogia stesin. I gat moa long 5,000 pipel i stap long dispela ples.



Auda i bilas • Baio Auda i wanpela meri husat i resis long Hiri Hanenamo Kwin long las wiken long Mosbi. Wanpela liklik mama bilong em i penim pes bilong em bipo em i kamap long resis

plantu ol minerel, olgeta samting i gat hevi bilong ol. Em i tok em i bilip nau olsem em i taim nau long gavman long mekim wanpela samting we olgeta manmeri i gat sans long gat olgeta samting.

Em i tok em inap nau long lukim planti ol skul liva long wan wan yia. Em i tok taim nau long Gavman long putim gret II na 12 i go wantaim ol hai skul.

Bai taim ol i kam aut ol bai bikpela inap na i gat inap save long lukautim ol yet.

"I no gat narapela rot moa. Dispeal em wanpeal rot tasol na yumi mas mekim nau," em itok.

Sir Serei i tok narapela hevi nau i stap long kantri em Bogenvil tasol em i no laik toktok long en bikos hevi i save senis olgeta taim.

TU MINIT TINGTING

YUMI OLGETA I HANGRE LONG HOLIM PAWA

"Holi Spirit bai kam na yupela bai kisim pawa." (Apos 1:8)

YUMI olgeta i gat strongpela bilip long kain pawa. Yumi ting tasol long tambaran na masalai na posin na marilla na puripuri na sanguma na yumi save guria. Pawa i hait i stap long ol.

Em i wankain olsem lektrik pawa. Yumi no inap lukim lektrik pawa, tasol em i stap insait long waia o long bateri. Dispela pawa insait long waia em inap kikim yumi nogut tru. Em inap kilim yumi i dai. Sapos yu laik traim kik bilong em, orait, yu mas holim tasol waia bilong ensin bilong ka o bilong mowa i save katim gras.

Lektrik pawa em inap mekim planti kain wok.

Em inap hotim stov. Em inap wokim ais long frisa. Em inap laitim lam. Em inap mekim musik na toktok i kamaut long redio na kaset masin.

Dispela strongpela samting yumi

kolim lektrik pawa, em i wanpela gutpela tok piksa bilong Holi Spirit. Lektrik pawa na Holi Spirit, tupela i save mekim wankain wok. Sapos yumi les long bihainim tok bilong God, na yumi les long go long lotu, na yumi les long pre, em i olsem yumi kol pinis. Orait, nau Holi Spirit em inap hotim yumi gen, na kirapim bel bilong yumi long mekim olkain gutpela pasin gen. I olsem em i hotim bateri bilong yumi.

Sampela taim skin bilong yumi i save skrap long mekim kain kain pasin nogut. I olsem wanpela paia i stap insait long bel bilong yumi. Satan i hotim yumi, i pulim yumi, i duim yumi. Nau pawa bilong Holi Spirit em inap kolim bel na laik nogut bilong yumi olsem bokis ais i save mekim kol wanpela hap ain i hot nogut tru.

Sampela taim lektrik pawa i mekim ol lam i lait na i pinisim tudak insait long wanpela rum. Holi Spirit i mekim wankain long taim em i givim ol nupela tingting na aidia long yumi. Em i olsem wanpela lait i kilaim rum tingting bilong yumi.

Long narapela taim gen, lektrik pawa i save mekim ol kain kain ensin na moto i ron bilong mekim kain kain wok. Holi Spirit tu i wankain: em i kirapim bel bilong yumi long mekim kain kain wok na gutpela pasin bilong helpim ol arapela manmeri.

Na tu, olgeta gutpela save inap long ronim olkain masin na ensin, em i no kamap nating. Nogat. Em i kamap long pawa bilong God. Na dispela pawa bilong God em i Holi Spirit tasol.

Bikos lektrik pawa i givim laip long redio na kaset masin na

video, nau ol inap autim planti kain toktok long yumi. Holi Spirit i stap insait long yumi tu na em i save givim olkain gutpela tok stia na tok klia long yumi long dispela samting yumi kolim "tok insait". Yes, em i insait; tasol em i Holi Spirit i stap insait.

Long taim Holi Spirit i bin kamdaun long ol aposel, i olsem lektrik pawa i bin sutim ol. Ol i no moa pret; ol i no moa hait. Nogat tru. Ol i opim ol dua na ol i go ausait na ol i mekim strongpela tok long planti kain tok ples. Givim pawa long redio na em tu bai mekim toktok long planti kain tok ples.

Sapos lektrik pawa i kikim yu, bai yu no inap sanap nating. Nogat. Bai yu kalap na bai yu singaut. I olsem tasol long taim Holi Spirit i kam insait long yumi na yumi pilim. Yumi no inap sanap



FRANK MIHALIC I RAITIM

nating. Nogat.

Tasol Holi Spirit em i olsem pawa i hait insait long lektrik waia. Em i slip na i wet i stap inap yumi opim swis bilong lait o redio o kaset. Nau tasol em inap mekim olkain wok bilong em.

Yumi mas opim swis bilong Holi Spirit long laip bilong yumi bai em i hepi long kam insait na wokim olgeta kain wok wantaim pawa bilong em. Goan, yu no wet. Opim swis nau tasol na pawa bai kam insait long yu.

Planti Pasifik manmeri i bin lotu long Dos Bosco

BIPELA misa tru i bin kamap long Don Bosco Teknikel skul long las Sande we planti Katolik manmeri i bin kamap wantaim ol manmeri Pasifik i kam long pilai.

Katolik Sios i go pas long redim dispela misa na moa long 17,000 PNG manmeri wantaim samting olsem 2,000 pilaia bilong Frens Polinesia, Westen Samoa na Solomon Ailan i kamap.

Namel long ol lain i kamap em minista bilong Jastis, Bernard Narokobi na Embeseda bilong Pilipins.

Sampela ol Pasifik manmeri i no save long Inglis, olsem na i gat man tu i stap long taim bilong lotu i tanim toktok i go Frens.


Asbisop Korungku bilong Katolik Sios Peter Korungku wan-

taim Pater Savina i go pas long dispela lotu.

Bihain long lotu i gat ol kain kain pilai i

kamap. Ol lain bilong Solomon Ailan i soim wanpela danis bilong ol. I gat tu ol singsing

grup bilong ol kain kain hap i kamap danis long amamasim ol Pasifik Ailan manmeri.



Tingim namba wan independens • Ol plis, ami na woda i karim fleg bilong PNG i go long aisim i go antap long Independens Hil long Mosbl. Wanpela lotu i bin go pas long dispela taim bilong aisim fleg

Lutren Sios i senisim laip bilong ol trabel man

TRIPLELA biknem raskel long Mumeng distrik long Morobe Provins nau i senisim laip bilong ol

Ol sios lida bilong Luteren sios i bin givim tripela nupela buk Baibel long ol dispela raskel bilong ples Parakris. Tripela yangpela manki ya i no laik bai nem bilong ol i kam aut.

Wanpela mama bilong ples Yatu Nikotem, i tok long bipo yet i kam nau, ol manki bilong dispela ples i save mekim planti bikhet pasin. Ol i save mekim ol pasin raskel tumas long rot na arapela manmeri bilong narapela provins.

Em i tok sampela ol manki ya i go kisim planti yia long haus kalabus long Buimo tasol ol nupela manki i

wok long mekim yet.

Yatu i tok stat long, 1989 i kam, dispela pasin bilong bikhet long rot namel long Lae na Wau Bulolo i wok long kamap bikpela. I save gat planti stil pasin long ol pasindia ka na bas.

Sampela stil tu i save kamap long ol kago bilong ol bikpela stua long Wau na Bulolo antap long ka.

Long dispela yia yet, ol Rait Skwat bilong Lae i stat long kam insait long ples na opim dua long ol manmeri long nait. Em i tok ol meri i karim ol pikinini wantaim ol samting na ronawe i go hait long bus. Olgeta manmeri i lusim ples na tasol i stap.

Long de na nait ol plis i wok long kam yet. Yatu i tok em i karim tripela pikinini man bilong em na ol i save slip tasol long bus.

Em i tok planti samting long ples i bin bagrap. Ol plis i brukim ol samting long haus na kukim ol haus tu wantaim. Ol papama i save kros no gut tru bikos olgeta samting i kamap long rong bilong ol pikinini man bilong ol tasol.

Tasol long dispela taim long mun Julai, ol lida bilong sios i lukim sindaun bilong ol pipel i no gutpela long dispela ples Parakris. Olsem na ol i askim ol plisman long lusim hevi ya i go long han bilong sios yet long stretim pastaim.


Ileksen De bilong Papua Niugini, Me - Jun 1992

Gavana Jenerel bilong Papua Niugini i tok orait long dispela taimtebol:

Givim ol Pepa bilong	Vot 4 klok apinun	26 Mas, 1992
Ol Nominesen i pas	12 klok (belo)	24 Epril, 1992
Stat long Kaunim ol	Vot	13 Jun, 1992
Pinis long Kaunim ol	Vot	27 Jun, 1992

POTO BILONG OL KENDIDET

Olgeta lain husat i laik resis long Namba 5 Nesenel Palamen Jenerel ileksen long 1992 i mas salim tupela poto i kam hariap. Dispela poto i ken kala o blak na wait tasol. Na bikpela bilong ol poto i mas wankain olsem dispela i save stap long paspot (tok orait buk bilong go long ovasis). Olgeta nominesen bai pas long 24 Epril, 1992. Olsem na salim ol poto i kam pastaim long dispela de.



Authorised by Reuben Kaiulo, Electoral Commissioner Papua New Guinea

Raitim nem long baksait bilong ol poto. Na salim i kam long dispela adres:

Electoral Commissioner,
Electoral Commission
P.O. Box 5348,
Boroko,
National Capital District.

Salim tu ol negetiv bilong poto i kam.

Putim long nem bilong: Mista Michael Malabag

OL PABLIK SEVAN MAS LUSIM WOK

Husat Pablik Sevan i laik resis long ileksen i mas lusim wok bilong em pastaim long 25 Septemba, 1991. Long wanem dispela bai givim em sans bilong aplai gen long wok sapos em i lus.

Kisim moa tok save long Mista Malabag long telipon namba 25 9110.

Prins Andrew laik kam bek long PNG

NAMBA tu pikinini bilong Kwin Elizabeth, Prins Andrew i go pinis long Inglen tasol em bai kam bek long PNG wantaim pikinini bilong em long bihain taim.

Prins Andrew i tok aut long dispela long wanpela liklik kaikai em gavman bilong PNG i putim kamap long amamasim em long Travelodge hotel long Mosbi. Dispela em las bung bilong em wantaim ol bikman bilong PNG bihain long em i kisim balus i go bek long Inglen long neks de.

Em i tok, "Narapela taim mi kam long PNG bai mi kam wantaim famili bilong mi. Na bai ol yet i lukim ol kain kain naispela samting long kantri bilong yupela.

"Mama bilong mi na ol narapelalain bilong famili bilong mi tokim mi long PNG na mi redi tru bipo long mi kam, tasol mi kirap nogut long lukim ol planti moa ol gutpela samting long olgeta hap mi

raun long en." Em i tok wanem samting em i lukim i winim samting em i ting bai em i lukim taim em i

kam. Em i tok PNG tu i gat ol planti ol risoses long helpim em long go het. Prins Andrew i tok

Saut Pasifik Gems i soim stret wanem kain ol bikpela samting em gavman bilong PNG i ken mekim long soim

ol narapela manmeri long wol. Em i tok em i kirap nogut tu long lukim olsem yumi olgeta manmeri long PNG.



• Primia bilong Isten Hallans, Robert Atiyafa i soim Prins Andrew raun taim em i go lukluk raun long Goroka

CIS Komisina bai lukluk raun long Esia

BOS bilong ol haus kalabus insait long Papua Niugini bai go kisim skul long ovasis long kisim moa save long stretim ol haus kalabus na ol kalabusman na meri wantaim.

Koreksenel Sevis Komisina, Henry Tokam lukluk raun long ol haus kalabus long Saina, Malesia na Indonesia long dispela mun Septemba.

Insait long dispela raun Tokam bai bungim ol narapela bikman na opisa bilong ol haus kalabus long ol dispela kantri. Ol bai toktok na helpim narapela wantaim tingting long stre-

tim hevi bilong ol haus kalabus na ol kalabusman na meri long kantri bilong ol yet.

Tokam bai tok aut long ol hevi bilong em olsem long skul bilong haus kalabus, trening, wok bilong lainim ol kalabusman, hevi bilong ol wan wan kalabus man na meri, haus kalabus na komyuniti na wok painim aut na developmen.

Em bai raun long lukim sampela haus kalabus na trening koles bilong ol kantri ya.

Tokam bai bungim stap insait tu long

bikpela kibung bilong Koreksenel Edministreta insait long ol Esia na Pasifik rijen. Bai ol i toktok long ol dispela hevi na sampela moa ol i gat long en.

Em bai pinisim lukluk raun bilong em long Indonesia we em bai lukim ol haus kalabus na ol wok bilong ol bihain long em i kam bek long Papua Niugini.

Tokam bai tok aut tu long ol samting olsem ol sekyuriti long ol haus kalabus, trening program na ol liklik wok bisnis bilong ol kalabusman na meri i save mekim.

Sandaun sekap long paul pasin long hai skul

EDUKESAN divisen long Sandaun provins i holim wanpela wok panim aut nau pinis i go insait long St Ignatius Hai Skul long sekim sapos wanpela skul meri i gat bel o no gat.

Dispela i bihainim sampela tok win i bin kamap long Sandaun provinsal esembli kibung long 30 Ogas. Mema bilong Aitape Sentrel, Joe Amir i tok esembli olsem wanpela meri i raun wantaim wanpela tisa na nau meri ya i gat bel.

Amir i askim minista bilong Edukesen, Arnold Lokowai sapos em i kisim sampelariot long dispela tok win o nogat. Lokowai i tok aut olsem em i no kisim ripot tasol em bai askim divisen bilong em long painim aut.

Lokowai i tok dispela em bikpela samting na memba bilong Aitape Sentrel i gat rait long bringim hevi go long Provinsal Edukesen Bot na toktok long en.

Edukesen divisen i no tokaut long ripot bilong ol tasol ripot i kam long St Ignatius Hai Skul i tok olsem dispela ol toktok i no tru. Em ol tok win nating tasol.

PLIS



RIPOT

i kam long pes 2

• Ripot i tok wanpela man i bin dai bikos meri bilong em i katim bro bilong em long naip. Man ya i bin kamap long Drakikir helt senta tasol em i dai bikos em i lusim planti blut.

Ripot i tok olsem man ya i bin kros wantaim meri bilong em na paitim em. Meri i bekim na kisim wanpela naip long haus kuk na katim long bro bilong em. Dispela naip i bagarapim sindaun bilong man bilong em. Na em i dai bihain long haus sik.

Narapela birua i kamap namel long Wewak na Aitape rot. Ripot i tok olsem 6-pela man pasim pes bilong ol na holim tripela gan na pasim rot. Ol i stapim wanpela ka bilong Jimmy Earthmoving kampani na stilim samting inap long K5000 na masin. Na tu pats bilong ol ka wantaim K150 kes mani. Ol plisman i no holim pasim ol dispela man yet.

MADANG: Plis ripot i tok olsem ol raskal man i bin brukim tupela haus long Madang. Wanpela bilong haus ya em hostel. Ripot i tok ol dispela raskal i brukim hostel na stilim mani wantaim ol samting insait long haus. Na tu ol i stilim pas pot bilong tupela marit bilong Mexican.

Tasol ol plisman i kamap hariap na painim dispela paspot wantaim ol arapela samting bilong hostel. Nau ol plisman i wokim wok painim aut yet holim pasim ol dispela raskal man ya.

• Ol plisman i holim pasim wanpela bikpela dokta long Madang bikos em i holim pasim stap wanpela .38 pistol long han bilong em. Ripot i tok olsem dispela pistol i bilong Goroka pistol klap.

Ripot i tok dispela dokta em i wanpela laip memba bilong dispela pistol klap tasol ol plisman i kisim bek pistol ya na bai sasim em long bihain taim bikos em i holim stap dispela gan long pablik ples.

MADANG: Wanpela kalabusman husat em ol plisman i bin holim bihain long em wantaim arapela 5-pela i ranawe las wik i bin dai long Madang haus sik. Tasol ol plisman i no inap tokaut long wanem as tru na dispela man i dai.

Wanpela wok painimaut i kamap nau bilong sekap long wanem as tru na dispela kalabusman i bin dai.

MAPRIK: Long Is Sepik provins las wiken, 4-pela man i bin bagarapim tripela meri. Plis ripot i tok dispela ol birua i bin kamap long Wosera na Maprik. Ol plisman i wok long painimaut yet long ol dispela birua na ol i luksave pinis long sampela bilong ol dispela man.

MR BOSMAN BILONG STOA

I gat **FRI** Hubba Bubba Bag bilong yu!

WRIGLEY'S ARROWMINT CHEWING GUM 10t

WRIGLEY'S PK CHEWING GUM 10t

WRIGLEY'S JUICY FRUIT CHEWING GUM 10t

hubba bubba

BIG BOY

taim yu baim 5 PELA BOKIS long wanpela long dispela prodak long SEETO KUI PTY. LTD. Long Lae na Pot Mosbi Long mun Septemba 9th – Oktoba 18th tasol!

Isrel lusim planti kalabus man fri gen

ISREL i wok long lusim nau ol planti kalabusman bilong narapela kantri i go bek long kantri bilong ol.

Isrel i lusim pinis 51 kalabusman bilong Arab kantri na 9-pela bilong Lebanon.

Isrel i tok nau wok i stap gen long han bilong Shi'ites, ol Islam long lusim ol lain bilong i stap long kalabus bilong ol tu. Ripot i tok dispela em stat bilong pinisim ol birua pasin i stap namel long ol Isrel na arapela Midel Is

kantri long bipo i kam.

Ol Islam Jihad i tok pinis long ol bai mekim wankain bihain long ol i lusim tu wanpela kalabusman bilong Isrel, John McCarthy. Ol i bin salim pas na poto bilong ol kalabusman bilong Amerika na arapela kantri ol i holim i stap igo long Nius Ejensi long Berut. Ol i tok long pinisim ol birua pasin i stap bipo.

Jenerel Seketeri bilong Yunaitet Nesen, Mista Perez de Cuellar i bin kamap long dis-

pela taim long lukim ol kalabusman em Isrel i lusim ol i kam aut.

Long poto ol i lukim tu piksa bilong wanpela balus pailot bilong Amrerika em ol i bin holim long 12 Me, 1989. Man ya em Jack Mann.

I gat gutpela bel isi i kamap nau long taim Isrel i wok long lusim ol kalabusman bilong ol Midel Is kantri na Westen kantri i kamaut. Ol arapela Midel Is kantri husat tu i holim ol sampela kalabusman

bilong Isrel na arapela Westen kantri tu i tok long stat lusim ol lain ya i go bek long kantri bilong ol.

Toktok i bin kamap long 4-pela man bilong Iran husat i bin lus long 1982. I gat bilip olsem olgeta lain ya i bin dai pinis. Dispela i bihainim hevi i kamap long Iran i mas lusim ol kalabusman bilong Isrel i kam bek.

Iran i kalabusim tu tupela Amerika man, Joseph Cicippio husat i gat 60 krismas nau John Mann, husat tu i gat 77 krismas nau. Tupela wantaim i kam aut long kalabus.

Ol bikman bilong Midel Is kantri bung wantaim opisa bilong Yunaitet Nesen long tokaut long tingting bilong ol. Ol i tok dispela em stat bilong kamapim gutpela pasin na gutpela sindaun long Midel Is rijon.



• Ol man husat i laik bai Nevi bes long Pilipins i stap yet i protes long gavman bilong Pilipinis long soim sapot bilong ol

Aquino redi tasol long Amerika lusim Pilipines

OL ami bilong Amerika i laik stapim bes bilong ol long trabel eria bilong Filipin na i go bek.

Ami bilong Amerika i bin was long trabel hap bilong Filipin long 10-pela krismas nau. Ol i bin kisim tok orait long stap inap 25 krismas na was long dispela rijen.

Dispela was i bin kamap taim olpela

Presiden Corazon Aquino i bin dai na meri bilong em i kisim ples bilong em. I bin i gat planti pait na bagarap i bin kamap long dispela taim long painim nupela Presiden.

Meri bilong Corazon na nupela presiden, Misis Aquino i bin kamap Presiden long dispela taim. Ol i kisim helpim bilong Amerika

long kam was long dispela trabel eria na Misis Aquino i ken go het long wok bilong em olsem presiden.

Bai ol i vot long dispela tingting bilong lusim ol ami bilong Amerika i go bek na Filipin i ken was long em yet.

Ol kominis grup husat i bin birua long bipo wantaim Presiden Aquino.



Rhino tok halo • Dispela enimel ya em ol i kolim long Rhino i save stap long Afrika. Tasol dispela long poto i bin stap long wanpela nesenel pak long Inglen. Rachel Igram i bungim em long wanpela festival long biktaun bilong Inglen, London

Suharts askim ol timba kampani long lukautim ol diwai

LONG 40 krismas bihain bai Indonesia i lusim olgeta diwai bilong em long wok bisnis bilong timba.

Ripot i tok Indonesia i save kisim moa mani bilong ranim kantri i kam long diwai tasol graun bilong em long planim diwai i no gat gutpela gris long planim ol kain kain stail diwai em i wok long mekim stadi long en.

Dispela hevi i stap nau long han bilong minista bilong Fores na minista bilong Populesen na Envaromen. Tupela i wok long traim painim sampela gutpela tingting na rot bilong stretim dispela hevi.

Tupela i wok long painim rot bilong timba

Indastri insait long kantri i mas ran gut na sapotim em yet long ol arapela wankain hevi.

Tupela i tingting long lusim moa long 49 milien hekta hap bilong graun i stap nating. Dispela bai karamapim ol hap em ol diwai i stap long en.

Dispela tingting tu bai bihainim plen bilong Konsevesen long sevim laip bilong sampela diwai na samting bilong bus. Ol i stapim pinis long baim ol nupela diwai i kam long narapela kantri.

Gavman i bin sasim pinis wanpela timba kampani pinis. Kampani ya em Barito Pasifik na em i kisim sas long i no katim out diwai bihainim plen na

lo i stap pinis.

Tasol dispela kain pasin bilong gavman i no save kamap olgeta taim. Bikos em i sot tu long ol wokman na i no gat ol sampela samting bilong yusim long dispela kain wok. Olsem na bai i gat ol helpim i kam long ovasis yet tasol gavman i mas wok klostu wantaim ol.

Long 1986, Indonesia gavman i bin givim administresen wok i go long Sosaiti Jenerel de Seveilens (SGS) bilong Swis long lukautim ol kastoms bilong em.

Kampani ya i wok i go yet olsem na sapos em i winim narapela 4-pela yia kontrak bai em i go moa long wok.




Askim long helpim • Wanpela refugl manki bilong Vietnam long Hongkong i holim fleg bilong kantri bilong em long hap salt na fleg bilong Inglen long hapsalt. Em i meknais long ol fleg long askim Praim Minis na bilong Inglen, John Major long helpim ol taim Major i go raun long Hongkong

In support of the South Pacific Games, the Bank of PNG announces the sale of the following games commemorative currency. Profits from these sales will be donated to the South Pacific Games Foundation.

Folder



50t Wallet



Full Sheet



The seven sided 50t Games Coin comes in a plastic wallet and has an engraving of the national crest on the reverse and the logo of the 9th South Pacific Games on the obverse side.

Price K2

Folders depicting different sports activities have been especially made to package specially printed K2 banknotes for the Games.

The Special Games K2 banknote is a plastic note and has all the basic design features of the normal paper K2 banknote with the addition of:

- The logo of the 9th South Pacific Games in its full colours on the top front left corner.
- A "see through" window displaying the logo of the Bank of Papua New Guinea which can be observed from both sides; and
- The prefixes "SPG 9" represents the 9th South Pacific Games followed by low serial numbers "00" to distinguish them from ordinary circulation notes.

Price K5

For the first time ever in Papua New Guinea limited number of specially made full sheets (not guillitoned) made up of 35 x K2 banknotes are available.

Price K200 per sheet

All items are legal tender for their face value; and may be purchased from the Bank of PNG, Douglas Street, Port Moresby or through the mail by using the coupon below:

Official Order Form

TO: THE BANK OF PAPUA NEW GUINEA
P.O. BOX 121
PORT MORESBY
PAPUA NEW GUINEA

TEL: 22 7295
FAX: 21 1617

Please accept my order for

Quantity	Item	Amount Enclosed
.....	50t Wallets @ K2-00 each plus 50t P & H.
.....	K2-00 Folders @ K5-00 each plus 50t P & H
.....	Full sheets @ K2-00 each plus K2-00 P & H

Name:

Address:



• Mama bilong Yasser Ibrahim i holim em na i kral taim ol Palestain i lusim em i go fri gen bihain long planti yia long kalabus

Ol pater na pasta i noken tokaut long sin bilong ol nara-pela

INSAIT long lo bilong buk Baibel, ol pasta na pris i mas harim sin bilong ol manmeri husat i kam na autim long ol.

Ol manmeri husat i pilim em i mekim sin long planti samting bilong graun na i wari long dispela, i save go lukim pasta na pris bilong ol long dispela. Sampela bilong ol sin ya i liklik we ol manmeri save mekim long olgeta de insait long laip bilong ol.

Sampela man i save kamap long pris na pasta long autim ol sin ol i mekim na i brukim tu lo bilong kantri. Sampela ol i kilim man i dai, sampela i stilim bikpela mani o brukim haus o samting.

Ol wokman bilong sios i save harim ol dispela sin bilong ol manmeri tasol aninit long lo bilong Baibel, em i no inap long tokaut long dispela. Em i no inap long tokim narapela man o kot Jas long sin bilong wanpela man em i harim na prea long en pinis. Lo bilong Baibel i tambuim dispela.

Long hap bilong Yurop long taim bipo, ol i plis i save kilim na kalabusim planti bilong ol pasta na pris long haitim rong bilong ol man i brukim lo. Man i brukim lo i save autim sin bilong em pinis long pasta na pris. Taim loman i holim em, ol i save askim pris na pasta ya long tokaut long rong bilong man ya. Tasol em i no inap long tokaut long dispela. Olsem na ol loman i save tainim bek na mekim save long ol dispela pasta na pris.

Tok bilong Baibel i klia olsem, maski sin i bikpela o liklik, God i save rausim sin bilong ol taim em i daunim em yet na autim long God.

Sapos wanpela man o meri i wari tru na pilim sori tru long bel bilong em long ol sin em i mekim, pasta na pris i save rausim sin bilong ol. Taim ol i autim ol sin bilong ol long wokman bilong God, pasta na pris i tokaut long maus bilong em long sin bilong man ya i pinis. God i marimari na mekim bel bilong sin man ya i isi.

Ol pris na pasta i no olsem wanpela kaunsil nating bilong graun. Ol i wokman na mausman bilong God long dispela graun. Ol i ken tokaut long sin bilong man i ken pinis long nem bilong God.

Em i no inap long tokaut long sin bilong man ya bikos dispela samting em i stap namel long God na sin man. Pris na pasta i gat pawa long stap long dispela taim na harim dispela toktok.

Sapos em i kamap long ai bilong kot long tokaut long sin bilong wanpela man, em i gat pawa long sakim tok bilong kot long no ken tokaut.

Planti pris na pasta long wol i bin go long kalabus na sampela i dai long haitim sin na rong bilong ol man we ol i bin harim long en.

Tupela wik i go pinis, primia bilong Nu Saut Wel, Wayne Goss i tok long strongpela wanpela lo i banisim ol pris na pasta long dispela kain hevi.

Laip long kalabus long Isrel olsem "hel"

ISREL i lusim pinis 51 kalabusman bilong Lebanon long kalabus long Saut Lenanon.

Ripot i tok moa long 300 kalabusman i stap yet long dispela haus kalabus. Ol lain husat i kam aut long dispela

kalabus i tok dispela i no olsem haus kalabus. Em i olsem hel ol i kam long en.

Namba olsem 29 kalabusman bilong kantri Lebanon i amamas tru long bung wantaim ol lain bilong ol gen. Ol i

tok ol i bin go long dispela haus kalabus long 1982 yet tasol sampela i go bipo.

Ol i tok dispela haus kalabus i no gutpela tru. Kaikai i no gutpela tru long bel bilong ol. Wanpela i tok ol i bin

putim em long wanpela liklik rum inap 6-pela mun. Dispela rum i no bikpela na het bilong em i pas long het bilong haus.

Narapela i tok em tu i kisim taim insait long wanpela liklik haus we

het bilong em i save pas long simen antap. I no gat lait na insait em tudak tasol na i nogat toilet tu long em. Planti samting long dispela haus kalabus em i no gutpela stret long wanpela man i stap long en.

Ol dispela lain Lebanon i go bun nating olgeta na skin bilong ol i bagarap no qut tru.

Planti pikinini i no putim su long skul

OL saveman i painim aut pinis ol bagarap i save kamap long lek taim ol pikinini i werim

su tumas. Ol saveman bilong Amerika i bin mekim dispela painim aut long

lek bilong ol yangpela manki taim ol i save werim ol su tumas. Tasol long Australia

long Kwinslən, ol skul pikinini i save pinis long dispela samting. Taim ol i go kamap long skul, ol i save rausim su na go lek nating long klasrum.

Dispela painim aut i tok lek bilong ol manki i no save groa gut bikos ol i save werim su tumas.

Ol manki i no save werim su i gat gutpela na strongpela lek bikos lek bilong ol i save wokabaut long strong bilong em yet. Ol masel tu long lek i strong bikos ol i save wokabaut na blut i ran na wok. Olsem na lek bilong ol i save groa gut na strong.

Tasol i gat sampela ripot i egensim dispela wok painim aut tu. Ol ripot i tok ol lek nating i save karim pipia nau arapela samting bilong givim sik long man. Ripot i tok tu long lek nating i ken kisim planti bagarap long ol sap samting. Bai i gat sua tu i kamap long lek



• Ol liklik pikinini i soim lek bilong ol sapos i kiln o doti. Wanpela stadi i tok aut olsem planti pikinini i save rausim su taim ol i go long skul.



Paia i kukim haus • Meri ya, Lula Smith i kral long mama bilong em husat pala i kukim em insait long haus long Nu Yok long Amerika long las wik. Man bilong em, Ronnie i holim em

I no gat indipendens selebresen long Sandaun

NAMBA tri taim nau Sandaun provins i no amamasim 15 ya Independens bilong Papua Niugini.

Ripot i tok planti manmeri long Sandaun provins i wok long wetim gavman long givim mani i go long ol i mekim kain amamas olsem. Ripot i tok tripela krismas nau em Sandaun provins i no bin amamasim Independens bilong Papua Niugini.

Planti distrik i no mekim wanpela samting long tingim dispela de bilong Papua Niugini.

Tasol ripot i kam long Imonda na Aitape i tok ol i bin holim sampela liklik pilai. Long Imonda, ol i bin pilaim soka na basketbal. Long Aitape, ol i mekim liklik singsing long Malol long opim nupela pilai graun bilong holim ol pilai na kain bikpela de olsem long bihain.

Ripot i tok long ol ples na haus wan wan i gat sampela amamas i kamap. Ol famili yet i bung long haus na mekim liklik amamas bilong ol yet wantaim famili.

I no gat wanpela lida tu i bin kamap long dispela taim na bungim ol manmeri long mekim sampela samting bilong amamasim dispela de.

Ripot i tok i no gat wanpela trabel long Vanimo taun na ol ples bikos ol bikpela stua i kisim tambu long salim ol strongpela dring. Olsem na Independens De long Sandaun provins i bin gutpela na no gat trabel.

Bihain bilong CCM i no klia

SIOS Kaunsil bilong Media (CCM) i laik senisim ol sampela samting long wok bilong em long Papua Niugini.

Ol eksekutiv bilong CCM i salim ol toksave i go long ol memba sios bilong em long givim ol tingting na toktok bilong ol long wanem senis ol i ken bihainim.

Ol memba sios em, Katolik, Engliken, Lutren, Evenjelikel Alaens, Selvesen Ami, Seven De Edventi na Yunaitet sios.

Dispela em namba tri taim ol i kolim dispela miting. Ol narapela miting CCM i bin askim pinis long en i no gat man i kamap. Dispela i soim olsem ol lida na wokman i slek long wok bilong CCM.

CCM i bin stat long 1975 long mekim ol lotu program i go wantaim ol redio program bilong Nesenel Brotkasing Komisn (NBC).

Reveren Stephen Pirina husat i siaman bilong CCM bai pinis long wok bilong em long Oktoba 30. I gat tingting long Alphonse Aime husat i namba tu siaman long kisim ples. Tasol ol bai wet yet inap long bikpela kibung bilong olgeta ya long kamap pastaim long ol i makim nupela siaman.

Nupela man bilong lukautim mani o tresera em, Sista Mary Hudson, husat i dairekta bilong Komunikesen Institut long Goroka. Misis Rose Koian bilong Litugikel Katekistiklstitu long Goroka i nupela Seketeri.

Bulolo i no gat plen bilong indipendens

BULOLO taun long Morobe provins i no gat amamas de bilong Independens long Mande 16 Septemba.

Planti manmeri bilong Bulolo taun i no save long wanem as na i no gat Independens De insait long tripela krismas nau

Presiden bilong Bulolo Forestri Wokas Yunion, Cleopas Yawal i tok planti manmeri i wok long toktok long dispela samting.

Em i tok Bulolo taun i gat moa long 5,000 manmeri i stap na ol i laik bai kain bikpela de olsem i mas i gat amamas bilong em. Tasol i no gat wanpela plen i kam long distrik opis long wanem samting em ol pipel bilong Bulolo taun bai mekim long Independens De.

Em i tok Bulolo taun i gat planti wokman na meri bilong arapela provins na planti ol asples i stap klostu. Sapos ol i ken amamasim Independens De, bai i gat planti manmeri tru i kamap.

Bikpela tok kros na askim i kamap nau long nesenel na provinsal memba bilong Bulolo. Ol pipel i askim tupela long wanem as tupela i no tingim dispela de na traim long mekim sampela samting long taun bilong tupela.

Tupela lida bilong Bulolo, Mista Mathew Bendum long nesenel gavman na Donald Donatsu bilong provinsal gavman.



Toana De • Gimani Kakani em wanpela wokmeri bilong PNGBC brens long Boroka. Em i bilas long tumbuna na kamap long wok long las Fraide. Em i bilas olsem long Toana De ol kalsere de bilong beng

HEI!

Noken tromoi!

OL TELEPON KAD
YU YUSIM PINIS BAI

WINIM YU K500!



EMTV bai tokaut long husat i win long olgeta nambawan Mande long wan wan mun long 7 klok long nait.

Ol prais bai yu winim long wan wan mun emi K100 bilong namba wan, K50 bilong namba tu na 10-pela namba tri prais long K10 telepon kad.

Na bai i gat bikpela resis i kamap long 9 Disemba. Ol prais bilong Disemba em K500 bilong namba wan, K250 bilong namba tu na 20 namba tri prais long K20 telepon kad.

Yu ken winim prais long wan wan mun na tu long bikpela resis long Disemba.

BAI YU RESIS OLSEM WANEM

- Putim olupela telepon kad yu yusim pinis long envelop na pasim.
- Raitim ful nem na edres bilong yu na telepon namba sapos yu gat long baksait bilong envelop;
- Salim envelop long dispela edres:

Used Phonecard Competition P.O.Box 2651, BOROKO

Taim ol i makim man long win bai ol i kisim envelop na i no long namba bilong telepon kad. Ol wokman bilong PTC na EMTV i noken resis.



Pos na Telekom

BUNGIM YU WANTAIM NARAPELA

WANTOK

BISNIS long PAPUA NIUGINI

WANTOK

PRAIS! PRAIS! PRAIS!

KAKAO

PRAIS bilong drai kakao long wan wan tan long Rabaul long Mandel Inap long Fraide long dispela wk.

	Mande 9.9.'91	Tunde 10.9.'91	Trinde 11.9.'91	Fonde 12.9.'91	Fraide 13.9.'91
Pe ol baiya sasim long papa bilong fementri	K794	K794	K793	K796	K816
Sapot prais	K410	K410	K410	K410	K410

Prais ol papa bilong fementri i kisim
K1,204 K1,204 K1,203 K1,206 K1,226
Sapot prais bilong kakao long dispela mun em K410 Dispela prais i no wankain olsem pe bilong kakao long ol narapela hap bilong kantri.

KOPRA

KOPRA Maketing Bod (CMB) i save baim kopra aninit long tripela grup. Namba wan grup em "Hot Air". Dispela em kopra i drai gut. Namba tu em "F.M.S" o (Fair Merchantable Standard). Dispela kain kopra i namel tasol. Narapela hap bilong em i nogut na narapela i gutpela. Na namba tru em "Smoke". Dispela kain kopra i no gutpela tumas.

Prais bilong kopra i pundaun long K5 long wan wan tan long Mosbi, Alotau, Lae, Madang, Wewak, Kavieng, Toboi, Kimbe na Kiela. Pe i stap olsem:

	Smoke	K175
	F.M.S	K177
	Hot Air	K180
Prais bilong kopra long ol liklik hap i stap olsem:		
SAMARAI	Smoke	K143
	F.M.S	K145
	Hot Air	K148
KANDRIAN na NAMATANAI	Smoke	K140
	F.M.S	K142
	Hot Air	K145
BUKA	Smoke	K139
	F.M.S	K141
	Hot Air	K144
FINSAFEN	Smoke	K135
	F.M.S	K137
	Hot Air	K140
LORENGAU	Smoke	K130
	F.M.S	K132
	Hot Air	K135
KEREMA	Smoke	K120
	F.M.S	K122
	Hot Air	K125

Prais bilong dispela wik i wankain tasol olsem bilong las wik tasol CMB i tokaut olsem sapot prais bilong dispela mun em K25.

KOPI

Pe bilong drai arabika kopi long wan wan kilogram long wik i stat long 26 Ogas.

Dispela i karamapim prais bilong kopi long dua bilong fektori na i no long sait bilong rot.

Kainantu	K1.05
Goroka	K1.10
Minz na Banz	K0.98
Hagen	K1.06
Lae	K1.05
Erap	K0.90
Wau/Bulolo	K0.95
Aseki	K1.00
Wasu	K0.85
Madang	K0.97
Is Sepik	K0.60

Ol ripot i kam long Kopi Industri Bod. Mipela i no kisim ripot bilong Hagen, Kundiawa na Wapenamanda



Exchange Rates

Bank buys at:	Notes	T/T
Australia	1.3570	1.3289
USA	1.0980	1.0635
UK	0.6370	0.6128
Bank sells at:		
Australia		1.3179
UK		0.6006
USA		1.0555
Solomon Islands		2.8628
China		5.6160
Fiji		1.5308
Hong Kong		8.1140
India		26.8000
Japan		139.9200
Malaysia		2.8790
New Zealand		1.7766
Singapore		1.7720
Switzerland		1.5290
Germany		1.7520
Gold rates (in US\$):		
per ounce		\$346.75
per gramme		\$11.15

Papua Niugini i no salim planti kopi long Ogas

NAMBA bilong beg kopi PNG i bin kamapim long dispela taim i go daun moa long namba bilong kopi long wankain taim long las yia.

Interim Bod bilong kopi industri i tokaut long Ogas ripot bilong en olsem dispela i

kamap bikos long planti as tru. Namba wan em ol papa bilong plantesin i no putim inap marasin long ol kopi long kamap gutpela na karim moa kaikai. Na namba tu em planti ol kopi diwai bagarap long sik bilong kopi long 1989 na 1990

na dispela yia ol i wok long isi long gro gen.

Na tu planti ol groa bilong Robasta kopi long nambis i les pinis long lukautim kopi bikos ol i no kisim gutpela mani long en. Ol i wok long salim ol narapela samting nau we ol i kisim gutpela mani


long en.

Long wankain taim tu, bikos PNG i no kamapim bikpela namba bilong kopi, em i salim liklik namba i go long ol narapela kantri. Namba bilong kopi beg em PNG i salim long dispela taim i go daun moa long namba em i

salim long wankain taim long ya yia.

Ripot bilong Bod i tok long namel long Januəri na Julai long dispela yia, namba bilong kopi pastaim i stap long 647 tausen beg long las yia i kam daun long 351 beg long dispela yia.

Namba bilong kopi PNG salim long wan wan mun



Kennecott bai go het wok long Lihir

KAMPANI i go pas long wok bilong gol Lihir long Nu Ailan provins, Kennecott Exploresen Limited i redi wantaim ripot long givim long gavman.

Siaman bilong Niugini Maining Limted, wankain kampani i wok bung wantaim Kennecott, Geoff Loudon i tok aut long dispela long Jun ripot bilong kampani. Loudon i tok

ol i pinisim ripot long Jun na nau i redi.

Loudon i tok Kennecott i stat long redim dispela ripot long 1986 na ol bai givim long gavman long Mas long neks yia. Dispela i kamap bihain long gavman i tokaut long srukim taim bilong join venja long redim ripot bilong ol i go long 9 mun na i no olsem

tupela yia olsem bipo. Loudon i tok long ripot i go long ol seaholda

olsem dispela em gutpela mak bilong ol wanem samting i wok

long kamap long wok bilong dispela 20 milien auns gol long Lihir.


Gavman givim K15 milien long kopi industri

NESENEL Gavman i givim pinis K15 milien olsem dinau mani long interim Kopi Industri Bod (CIB) long las mun bihain long mani bilong industri long kopi stebelaisesen fan i pinis long Jun long dispela yia.

Dispela em namba wan taim tru gavman i givim stret sapot mani long kopi industri bihain long 15 yia olgeta em industri i stap long kantri.

CIB bai bekim dispela mani taim prais bilong "Y" gret kopi nau i stap olsem K2.05 bai go antap abrusim K21.11 long wanpela kilogram. Sapot prais nau i stap olsem K0.30 long wanpela kilogram.

CIB i tok long Ogas ripot bilong en olsem mak bilong sapot prais bai go daun long 30 pesen long Novemba na prais bai stap olsem K1.96. Na long Novemba 1992, sapot prais bai go daun moa long 40 pesen. Long Novemba 1993 bai go daun long 50 pesen na long 1 Novemba 1994 bai i no gat moa sapot prais.



• **Tiket i go long Japan:** Namba tu bosman bilong Japan Embesi, Makoto wakasugi i givim tiket long ol Papua Niugini manmeri bilong go long Japan. Ol lain ya i go long las wik na bai i stap wanpela mun long hap.

pos 13



9th SOUTH PACIFIC GAMES
PAPUA NEW GUINEA 1991

CAMBRIDGE
A MAJOR SPONSOR

Is Nu Briten provinsal gavman i mas rausim ol manmeri long plantesen tu

Dia Edita,
Mi wanpela manki Tari long Saten Hailans provins tasol nau mi stap nau long Rabaul long Is Nu Briten.

Mi laik autim komplem bilong mi i go long Is Nu Briten provinsal gavman long pasin em i mekim nau long lusim ol manmeri bilong narapela provins i go

bek.
Mi laik tok olsem sapos provinsal gavman i laik mekim olsem orait em i mas rausim tu olgeta wokman bilong ol plantesen long provins. Sapos em i laik rausim tasol ol manmeri i no gat wok bilong ol em giaman tasol. Dispela hevi i stap long olgeta provins

insait long kantri bilong yumi na i no inap long pinis. Sapos yupela tingting long rausim tru ol manmeri bilong arapela provins, em i orait. Mi laikim bai yupela i ken toktok gut wantaim ol primia bilong mipela long narapela provins na stretim ol rot bilong mipela i bihainim long i go bek.
Mipela ol manmeri

bilong arapela provins i stap planti insait long ol kopra plantesen long Is Nu Briten provins. Olsem na sapos provinsal gavman i laik rausim ol manmeri bilong arapela provins, mipela tu i amamas long kirap i go bek long provins bilong mipela.

Tony Hara KOKOPO

Noken bagarapim nating ol meri Karkar

Dia Edita,
Mi wanpela meri Karkar long Madang provins na mi laik bekim pas bilong brata ya, Darius M. i bin kamap long Wantok Niuspepa long Fonde 19 Epril.

Brata ya i tok olsem ol meri Karkar save raun nating long Madang taun painim man na mani. Na tu em i tok planti meri Karkar save karim pikinini nating. Brata wanpela o tupela meri tasol save wokim dispela kain pasin. Na tu i no ol meri Karkar tasol save wokim dispela pasin. Planti meri long dispela kantri save wokim wankain wok. Olsem na maski long toktok long dispela kain pasin.

Brata i luk olsem yu wanpela lusman stret. Olsem na ol marit meri Karkar giamanim yu. Brata mi laik askim yu long lukluk gut pastaim na paul wantaim ol meri.

Brata mi laik tokim yu moabeta yu mas go long ples na painim wanpela meri na maritim. Na maski long raun long Madang nating na bagarapim het bilong yu long ol marit meri.

Mis D.T.Maring. MADANG:

I gat tokples Tolai tu long redio Is

Dia Edita,
Mi wanpela manki Wes Nu Briten na mi laik bekim pas bilong brata ya, John Nukwangjay i bin kamap long Wantok Niuspepa namba 870. Brata yu bin tok olsem redio Is Nu Briten i save ritim nius long tokples Tolai.

Olsem na mi laik toksave gut long iau bilong yu na bai yu harim gut. Redio Is Nu Briten i ritim nius long tokples Tolai taim mama bilong yu i no karim yu yet. Olsem na mi laik askim yu nau long tanim redio i go long redio Is Nu Briten na yu ken harim tokples Kuanua.

Plis mi askim yu opim gut iau na harim. Nogut hap tokples bilong yu bai kamap tu.

Brata yu i mas save olsem mipela save ritim nius long tripela tokples. Tok pisin, Inglis na tokples Kuanua bilong Is Nu Briten. Olsem wanem dispela tripela tokples i "SENSIBEL O NOGAT?"

Sapos em i sensibel orait brata maski long tanim redio i go long ol arapela stesin. Tanim tasol long redio Is Nu Briten.

Francis Tommy KIMBE.

Ol man paul olsem ol meri tu

Dia Edita,
Mi wanpela meri Manus na mi stap long Hagen taun. Mi laik autim komplem bilong mi i go long pasin mi lukim ol meri Hailans i save mekim.

Ol i save kisim nait na laik sutim ol narapaela meri, ol i ting i paulim ol man bilong ol. Olgeta liklik tingting no gut bilong ol long ol man bilong ol bai ol i laik kisim naip tasol.

Mi lukim dispela pasin i no gutpela bikos ol man bilong yupela yet tu i no save stap isi.

Miriam Kekes HAGEN

Daunim pe bilong ol meri kam daun

Dia Edita,
Mi wanpela manki Sauten Hailans na mi laik sapotim pas bilong brata Mandela Ponolo i bin kamap long 1 Ogas, long Wantok Niuspepa.

Brata i tok ol papamama i save sasim bikpela mani tumas long ol pikinini meri bilong ol.

Tru ol papamama i ken sasim ol man long baim pikinini meri sapos ol i laikmarit ol. Tasol mi askim yupela long daunim prais i kam daun liklik. Prais bilong ol meri i save antap tumas tasol ol i

Bus karamapim olgeta Mendi taun

Dia Edita,
Mi wanpela manki Mendi tasol nau mi stap long Navarai plantesen long Wes Nu Briten provins.

Mi laik save olsem memba bilong mipela ol pipel bilong Mendi taun stret i go we na bus i karamapim pinis Mendi taun.

Long taim bilong kempen yu bin raun long olgeta hap na mekim traipela maus wara tru long ol pipel.

Yu tok bai mekim ol kain kain samting. Nau dispela toktok bilong yu i go we?

Yu save raun long ol narapela taun long kantri na yu lukim tu o nogat. Sapos nogat, maski yu noken go nogut yu mangalim taun bilong ol.

Ol memba bilong dispela ol taun em olsem yu tasol ol i opim maus bilong ol na samting i kamap. Yu no save sem taim yu lukim olsem taun bilong ol klin moa long taun bilong yu?

Benson Ombo KIMBE

Kabwum haus sik i lapun olgeta pinis

Dia Edita,
Mi wanpela manki Kabwum na nau mi stap long Rabaul Is Nu Briten provins.

Mi laik sapotim pas bilong brata DDC Naum, i bin kamap long Wantok Niuspepa tupela wik i go pinis.

Brata Naum i tok memba bilong Kabwum i no mekim wanpela wok inait long eria bilong em.

Dispela tok bilong brata DDC Naum em tru bikos long taim memba bilong Kabwum, Tom Horick i stap long Palamen, em i no mekim wanpela gutpela wok long Kabwum eria. Em i no mekim o kamapim ol samting em i promis long mekim.

Mi laik tok olsem dispela haus sik nau i stap long Kabwum em wanpela olpela haus sik bilong bipo yet i stap. Dispela haus sik em ol tumbuna bilong mipela long bipo i no dai yet na ol i save kisim marasin long em.

Narapela promis bilong memba, Tom Horick tu em long stretim ol rot insait long Kabwum eria. Mi lukim ol dispela rot no gut i no senis yet. Ol promis bilong memba i no karim kaikai yet. Olsem na mi laik askim, yu wetim wanem taimtru long mekim kamap ol dispela tok promis bilong yu?

Mopex Maxon Soso RABAU

Jeffery Kambagi MADANG

Stap gut long ples na komplem long ol memba

Dia Edita,
Mi wanpela manki Kimbe long West Nu Briten provins na mi laik autim liklik wari bilong mi long Wantok Niuspepa na ol arapela manmeri ken lukim.

Wari bilong mi olsem, planti manmeri save raitim pas egensim provinsal na nesenel memba taim ol i lusim ples bilong ol. Dispela pasin i no gutpela long tingting bilong mi bikos yupela bai i no save long wanem samting ol memba i kamap long ples. Na yupela tok

kros nating. Sapos yupela laik bringim wari, moabeta yupela go bek long ples na raitim pas stret long en. Na em bai save olsem ol pipel i sot long kain samting olsem. Na em i ken helpim.

Yupela maski long paul nabaut long ples bilong ol arapela man. Na toktok nabaut long ol memba bilong yupela. Olgeta memba i gat iau long harim toktok. Ol bai amamas long harim wari bilong ol pipel long ples.

Na sapos yu stap long wanpela hap na raitim pas long ol i helpim yu bai nogat tru. Yu bai westim taim na pen long raitim pas. Tasol ol bai i no inap harim tok bilong yu.

Wankain samting ol bai wokim sapos yu wanpela man tasol rait na askim ol long mani. Pastaim long ol bekim pas, ol bai kisim pas bilong yu i go long toilet. Bikos mani ol i holim i stap em bilong grup na ol pipel bilong em long ples.

F. Tommy. KIMBE NGATU.

Ol man noken tromoi pipia long wara Ramu



Dia Edita,
Mi wanpela manki Ramu, tasol nau mi stap long Brahman long Madang provins.

Na mi gat wanpela wari olsem na mi laik autim long Wantok Niuspepa. Na ol manmeri husat i stap arere long Ramu Suga ken lukim. Mi lukim olsem planti manmeri save tromoi pipia insait long wara Ramu. Mi laik tok olsem dispela pasin em i no gutpela tumas long ai bilong mi na tu long ol arapela manmeri husat save waswas long wara Ramu.

Mi tokaut long dispela hevi bikos planti taim leg na skin bilong mipela save bruk nabaut long botol

na tim i stap insait long wara. Olsem na mi laik tokaut olsem yupela i no ken tromoi pipia nabaut olsem. Painim ples bilong pipia na tromoi stret long en. Na maski long tromoi nabaut long wara na rot. Bikos bruk botol na tin save bagarapim sindaun bilong planti man taim ol i go painim abus long wara.

Em tasol liklik wari bilong mi na yu husat brata o susa laik sapotim o egensim rait tasol long Wantok Niuspepa na mi yet ken lukim.

Moris Jack. MADANG.



Nem: Edward Andapiri
 Krismas: 19
 Nem: Roman Kem
 Krismas: 18
 Nem: Hom Ongol
 Krismas: 21
 Nem: Luke Towe
 Krismas: 19
 Edres: Malilimi Plantation
 NBPOD, Mosa.
 P.O.Box Kimbe
 W.N.B.P.

Mipela olgeta i laik mekim pren wantaim ol manmeri husat i gat wankain krismas olsem mipela long olgeta hap bilong kantri.

Nem: Aker Merembia
 Krismas: 16
 Edres: Kerowagi High School
 P.O.Box Kundiawa
 Simbu Province.

Hobis: Harim musik, bungim ol stem, klapim ol diwai na stori wantaim ol narapela. Mi laik mekim pren wantaim ol kain kain manmeri bilong PNG.

Painim Lus Pren

Dia Edita,
 Mi painim wanpela kandre bilong mi nem bilong em Robert Wambor. Em i go long Bialla long Wes Nu Briten tasol nau mi no save em i stap we nau.

Olsem na sapos yu lukim dispela pas, yu mas rait i kam long dispela edres. O sapos yu husat man o meri i save long em i lukim dispela pas, i gutpela long tokim em long rait long dispela edres;

Christopher Sirtimba
 C/Plus Sinkil
 P. O. Box 125
 Vanimo, Sandaun provins

Hagen haus sik mas stap kisim 50 toea

Dia Edita,
 Mi wanpela manki Hagen na mi stap nau long Hagen taun. Mi laik autim komplem bilong mi i go long ol haus sik long Hagen taun na long ol aut-stesin.

Planti taim ol manmeri i save sik na go long haus sik, ol dokta na nes i save askim ol long baim 50 toea. Sapos ol i no gat mani, bai ol i tokim ol olsem no gat mani.

Dispela pasin bilong baim 50 toea long haus sik i mas pinis bikos em sevis bilong gavman long ol pipel bling em long kantri.

Mi save lukim long ol toksave yupela i save putim olsem, taim sik i laik kamap, kam hariap long haus sik. Tasol sapos sik i laik kamap na no gat mani bai olsem wanem?

Dispela pasin bilong baim haus sik tasol i mekim na planti manmeri i save holim sik bilong ol i stap na givim i go long arapela manmeri gen. Sik i save go moa na kamap bikpela long olgeta manmeri wantaim.

Ol helt seketeri long provins na long nesanel level tu i mas luksave long dispela hevi na traim sensim dispela pasin.

Mufagi Kurl
 HAGEN

Bia kamapim bikpela hevi long Is Sepik

Dia Edita,
 Mi wanpela manki Wewak long Is Sepik provins na mi laik komplem long bia insait long provins.

Mi laik askim long wanem tru na gavman i oraitim provins long salim bia? Dispela samting tasol i mekim na bikpela hevi na trabel i save kamap insait long provins.

Mi laikim bai bia i mas pinis olgeta long provins na husat i man o lida i givim dispela tok orait long salim bia long provins i mas rausim gen dispela tingting bilong em.

Olgeta hevi i bin kamap pinis long provins em mipela olgeta i lukim long en i no gat narapela as moa. Toktok i ken kamap gut na pinis gut. Tasol taim olman i holimbia, dispela tasol i bagarapim olgeta gutpela tingting na rot i laik kamap na bikpela trabel n apait i save kamap.

Olsem na mi laik tok stret nau olsem, bia i mas pinis olgeta na ol stua na bisnis haus long Wewak i no ken tru long salim bia moa.

Nelson Maika
 WEWAK

Menesa kisim tambu long wok

Dia Edita,
 Mi wanpela manki Goroka long Isten Hailans provins tasol nau mi stap long Ramu Suga long Madang provins.

Mi laik komplem long pasin bilong menesa bilong bikpela stua long Ramu. Olgeta taim mipela i laik i go askim em long wok, bai em i tokim mipela olsem i nogat wok.

Dispela pasin i bin kamap long mi wanpela taim olsem na mi laik toktok long en. Mi bin go askim man ya long wok na em i tokim mi olsem no gat wok tru long mekim.

Tupela de behain, mi lukim tupela nupela man i wok long dispela stua. Mi kirap no gut tru na askim ol olela stua kipa long tupela man ya.

Ol i tokim mi olsem tupela nupela wokman bilong dispela stua. Ol i tok menesa i kisim ol bikos tupela em tambu bilong em.

Dispela pasin i no gutpela tru long mi bikos menesa bilong stua i giamanimmi na givim wok long tupela tambu bilong em yet. Dispela em bikpela wantok sistem pasin stret menesa ya i mekim.

Apo
 RAMU

Wapela hai skul i mas kamap long Wabag



Dia Edita,
 Mi wanpela man bilong Enga provins na nau mi stap long Ramu Suga long Morobe provins.

Mi laik autim wari bilong mi i go long ol provinsal gavman na nesanel gavman long lukim hevi bilong mipela ol manmeri

bilong Wabag. I gat wanepela hai skul tasol na dispela i no gutpela long mipela.

Arapela distrik olsem, Laiagam, Wapenamanda, Kendep na arapela i gat moa long tuela na tripela hai skul. Tasol Wabag i gat wanpela tasol.

Olsem na mi laik

Noken daunim nating narapela taun

Dia Edita,
 Mi wanpela manki Madang na nau mi stap long Wewak taun. Mi laikim bekim pas bilong susa, Susan La'abe bilong Wewak tasol nau i stap long Kimbe taun.

Susan i tok Kimbe taun i bagarap tru long planti pipia long arere bilong ol stua na opis. Em i tok tu olsem taun kaunsil i no save mekim gut wok bilong ol.

Gutpela tok bilong susa Susan, tasol mi no amamas tumas long yu daunim duan taun bilong narapela provins. Mi ting yu mas lukluk long daunim narapela taun.

Mi ken tok stret olsem Wewak taun em ples bilong pipia stret. Long arere bilong stua na opis o long maket ples, ol manmeri i tromoi pipia nambaut na bagarapim ples stret.

Mi yet bilong Madang na mi ken tok stret olsem, Madang taun em wanpela klinpela taun stret. Long dispela as na planti manmeri bilong ovasis i kam olsem turis na raun long Madang.

Olsem na Susan, yu no ken daunim narapela taun nating na i no skelim taun bilong yu yet pastaim.

Manki Madang
 WEWAK

Kokopo plisman abrusim ol trabel

Dia Edita,
 Mi wanpela manki Goroka long Isten Hailans provins na mi stap nau long Kokopo long Is Nu Britenprovins.

Mi laik autim bikpela komplem bilong i go long pasin mi lukim long ol plisman long Kokopo eria.

Mi bin lukim olsem ol na save mekim gut wok bilong ol. Planti taim ol i save abrusim ol trabel na raskel pasin i save kamap. Planti taim ol i no holim ol dispela bikhet man.

Mi save lukim olsem ol i save slip tumas. Raun bilong ol long ka i no save isi. Ol bai raun na painim ol meri long gris wantaim ol.

Wanpela taim i bin gat bikpela stil long Rabtrad kampani na ol plis i no mekim wanpela wantim long stapim ol stilman ya.

Mi lukim dispela pasin i no gutpela tru bikos ol i no helpim ol manmeri tumas long hevi bilong ol. Gris bilong ol wantaim ol meri i save moa yet na wok tru, gavman i laikim ol long mekim i no save kamap.

Mi ting sapos ol i no laik mekim gut wok bilong ol, orait ol i mas pinis long wok long kisim trening i stap na tu pianti man moa i laik kamap plisman.

Kini K. B.
 KOKOPO

OI BRA bai givap long 1993

Dia Edita,
 Mi wanpela manki Sauten Hailans tasol nau mi stap long Wes Nu Briten provins.

Mi laik autim wari bilong mi olsem long 1989, mi bin stap wantaim ol BRA long Bogenvil na mi bin harim stret long maus bilong ol olsem ol i no inap long pinis long pait inap long 5-pela yia olgeta.

I luksem long 1995 bai ol BRA i harim tok bilong gavman na stap long pait.

Olsem na mi laik askim gavman olsem, bilong wanem na gavman i wok long subim het yet long stretim Bogenvil?

I luk olsem gavman i wok long westim nating taim na mani bilong em tasol.

Mi save bikos mi raun wantaim ol BRA na ol i tokim stret. I luk olsem gavman i no save yet long dispela plen bilong Francis Ona na Sam Kauona. Olsem na gavman i mas opim ai na lukluk gut.

Dispela long wanpela 5-pela i no pinis yet olsem na BRA bai go het long pait. Olsem mi tok pinis ol bai pinis long pait behain long 5-pela yia.

Ol BRA i tokaut olsem ol bai givap long 1993, na dispela em taim we gavman bai go insait.

Tasol long dispela taim, gavman i mas traim long helpim ol narapela manmeri bilong kantri na lusim ol lain Bogenvil i stap pastaim inap long 1993.

Paul Ponpis
 KIMBE

Lo bilong God i tok noken kilim man i dai

Dia Edita,

Mi laik autim wari bilong mi long dispela nupela lo em Palamen i orait long en long kilim indai ol man em husat i kilim narapela.

Mi laik askim olsem olgeta ol memba bilong Palamen, yupela bilong ol narapela kantri o yupela bilong PNG yet.

Sapos yupela bilong PNG bai yupela i save olsem planti manmeri i save kolim PNG em kristen kantri. Na sapos em i kristen kantri, bilong wanem yupela i tok orait long dispela kain lo.

Peter Walgem
 WABAG

Luke Ulopo
 MOSBI

Ol meri PNG stail tumas long taun

Dia Edita,
Mi wanpela manki Goroka long Isten Hailans provins na mi stap long Ramu Suga long Morobe provins.

Mi laik autim komplem bilong mi long pasin ol meri i save mekim long ol taun bilong Papua Niugini.

Mi lukim planti i save putim ol longpela trausis i save tait tru long skin bilong ol. Sampela bai putim sotpela trausis na lek mit bilong ol i save stap ples klia.

Planti i save rausim ol gras long ai bilong ol na mekim pes bilong ol i senis i go narapela kain olgeta.

Mi laik tokim yupela stret olsem dispela kain pasin tasol na ol man i save laik mekim nabaut long ol meri long en.

Mi bin lukim ol wokmeri bilong PTC long Goroka i save mekim dispela kainpasin planti taim. Mi laik tokim yupela stret olsem i no longtaim bai ol man i katim ol dispela trausis bilong yupela na senisim dispela pes bilong yupela.

Yupela ol wokmeri bilong PTC long Goroka i ken mekim olsem long autim ol man tasol, mi ken tokim yupela olsem, ol longlong man bai laikim yupela. I no inap long yupela i painim wanpela gutpela man.

Allan Meten
RAMU

Sir Ignatius Kilage i wankainolsem Sir John Guise

Dia Edita,
Mi laik bekimpas bilong brata Ganna Jay bilong Makam i bin kamap long *Wantok Niuspepa* long Fonde 20 Jun.

Em i sapatim toktok bilong menesa bilong Butibam Progres long senisim nem bilong Sir Ignatius Kilage long stedium long Lae.

Mi laik tokim yu stret olsem nem bilong Sir Ignatius Kilage i wankain olsemnem bilong Sir John Guise long narapela stedium long Mosbi. Ol Papua i no komplem long dispela. Bikos ol i save olsem em man Samarai na em i mekim bikpela wok insait longkantri bilong mipela long bipo i kam.

Sir Ignatius Kilage tu em i wankain man olsem Sir John Guise olsem Gavana Jenerel bilong Papua Niugini. Planti bikman long ovasis kantri na ol manmeri tu i save long em.

Olsem na nem bilong em i mas stap yet long mipel ai ken tingim long bihain taim tu. Ol pikinini bilong yumi long skul bai lainim tu nem bilong man ya na kain samting olsem bai helpim ol long skul bilong ol tu.

Mathias Tembi
MADANG

Ol meri Hailans long Wewak lus tingting long ples

Dia Edita,
Mi wanpela manki Dagua long Is Sepik provins na mi laik bekim pas bilong susa Selly Jacob long *Wantok Niuspepa* namba 890.

Susa Selly Jacob i tok wanpela meri Sepik i bin paitim wanpela meri Buka long 5 Mail blok long Lae. Em i paulim man bilong meri Buka olsem na em i laik haitim sem bilong em na paitim meri Buka.

Tasol toktok bilong Selly i no gutpela na klia tumas. Em i tok em i stap long Hagen olsem na ating em i mas harim stori ya long sampela lainmeri.

Mi laik tokim yu stret olsem sapos yu kam long Wewak, bai yu lukim olsem meri Hailans i save kam long gbaim buai na i no save tingting go bek long ples bilong ol moa. Ol i kam na stap olgeta long Wewak.

Ol i save stap salim buai nabaut na paul wantaim ol maritman na man nabaut long Wewak.

Olsem na yu mas tingim gut na bihain yu bagarapim ol meri long narapela hap.

Moses Tom
WEWAK

Manki Goroka dai long singsing bilong Finsafen

Dia Edita,
Mi wanpela manki Goroka long Isten Hailans provins na mi laik raitim dispela pas i go long ol manmeri bilong Finsafen insait long Morobe provins.

Olgeta taim, mi save harim singsing string ben bilong ol Finsafen olsem Langema ben, mi save laikim tru. Singsing na musik i save brukim lewa bilong mi stret.

Taim kaset bilong Reks Ben i kamap gen, man mi no save tingting

gut na mi save danis long taim mi harim Reks Ben.

Long bikpela singsing de na taim mi lukim ol Finsafen i brukim kundu na singsing, mi no save lusim ol liklik. Mi save putim was long ol na stap wantaim ol i go inap long singsing bilong ol i pinis olgeta.

Mi no save ples Finsafen em wanem kain stret na ol lain bilong ol i save brukim lewa bilong mipela sampela wantaim ol song na nek bilong ol.

Mi raitim dispela i go long husat manmeri bilong Finsafen i ken lukim. Dispela em bikos mi gat laik tru long go lukim Finsafen wanpela taim tasol mi no gat wantok long hap.

Olsem na sapos husat gutpela manmeri bilong Finsafen i stap, plis bekim pas bilong mi sapos yupela i laik mi raun wantaim. **S. D. A Misin Rambau Goroka E. H. P.**



Memba bilong Makam gut wok

Dia Edita,
Mi wanpela manki Makam na mi stap long Rabaul taun long Is Nu Briten provins.

Mi bin kam long Lae na mi harim olsem provinsal memba bilong Makam Open, Steven Mambo i mekim gutpela wok long eria bilong em. Em i helpim ol sios grup, yut grup na ol liklik bisnis grup insait long Makam eria.

Mi harim olsem em i laik putim pawa lain i go insait long Mutzing eria.

Mi amamas tru long harim dispela bikos sapos pawa lain i go insait long Mutzing, bai em i helpim tru ol bisnis grup na wok i laik kamap insait long dispela hap.

Mi ting memba bilong Makam i mekim gutpela wok na mi yet i amamas tru long em.

Paulus Ella
LAE

Nalau i kisim ful sapat long ol pipel

Dia Edita,
Mi wanpela manki Morobe na mi laik sapatim pasin em primia bilong Morobe provins, Jerry Nalau i mekim.

Em i rausim ol manmeri husat i stap nabaut long graun bilong gavman long Lae siti.

Mi ting dispela em gutpela tingting tru bikos em i rausim ol manmeri i no gat wok na stap mekim ol bikhet pasin nabaut long provins.

Narapela tu, dispela bai helpim mipela ol manmeri bilong Morobe stret long painim sans long wok na painim arapela helpim na amamas.

Mi lukim long sait bilong wok, i no gat wok tru long Lae siti. I gat planti haus masin na bikpela stua nabaut bilong ol manmeri bilong Morobe i ken wok long ol.

Kallip Mato
BULOLO

Rot long Wantoat bagarap

Dia Edita,
Mi wanpela manki Wantoat na mi stap long Lae siti. Mi laik autim dispela tingting i go long ol pipel bilong Leron na Wantoat eria.

Mi bin harim olsem provinsal memba bilong Leron Wantoat, Mista Koni Bianga Wambam i sapatim tingting bilong katim daun baset bilong mentenens long Leron Wantoat rot.

Rot i go long ol dispela hap i no gutpela tru. Bikpela bus i karamapim rot na i no inap long tupela ka i abrusim narapela. Rot tu i kalap kalap na ol ka i ron long en i save painim planti bagarap hariap.

Ating memba bilong mipela i no tingting long stretim gut ples na eria bilong em. Em i laik mekim wanem tru na mekim dispela pasin.

Geame Yasipsa
LAE

Prais bilong ol samting long stua i dia tumas

Dia Edita,
Mi wanpela manki bilong Sauten Hailans provins tasol nau mi stap long Kimbe taun long Wes Nu Briten provins.

Mi laik autim wari bilong mi i go long ol prais bilong samting long stua.

Taim mi save laik baim kaikai long stua, ol stukipa i save askim mi long baim sels takis tu wantaim. Ol i bai askim mi long givim narapela 50 toea o 60 toea gen antap long prais bilong samting em mi laik baim.

Mi pilim dispela i no gutpela tru long mipela ol manmeri. I gutpela ol stua yet i ken baim ol dispela sels takis bai orait.

Planti bilong mipela ol manmeri i no save kisim gutpela mani na prais bilong ol samting long stua i save bagarapim mipela.

Mi ting gavman bilong mipela i mas opim ai bilong ol na traim luksave long dispela kain hevi tu bai i orait.

Edward Andapiri
KIMBE

Ol stoa long Gordon salim nogut kaikai

Dia Edita,
Mi wanpela manki Goroka long Isten Hailans provins na nau mi stap long Mosbi siti.

Mi laik autim komplem bilong mi long stua bilong ol Saina long Godens eria. Planti bilong ol dispela Saina stua i save salim ol kaikai ol i kukim long en.

Tasol mi no amamas tru long ol kaikai ya i mekim sampela bilong ol em bilong hap aste na de bipo.

Planti manmeri i kisim bel pen na komplem long dispela pinis. Olsem na mi laik putim long niuspepa bai olgeta manmeri i ken lukim na no ken baim ol dispela kaikai.

Mi ting ol dispela Saina i no save tingting long laip bilong ol manmeri. Ol i tingting tasol long mekim mani na ol yet.

Sapos sampela kaikai stap yet na i no pinis, orait ol i mas daunim prais bilong em bai ol manmeri ken baim na pinisim. Sapos ol Saina ya i mekim olsem bai kaikai bilong wanpela de i ken pinis na i no inap long stap i go long narapela de. Ol i ken kukim nupela kaikai bilong narapela de.

Sapos ol i no senisim dispela pasin bai mipela i raitim pas i go long opis bilong Helt Dipatmen long kam na sekim ol kaikai bilong ol dispela stua.

Dadawin Joe
MOSBI

Noken wokim rot namel long Vanimo na Jayapura

Dia Edita,
Mi wanpela manki Sandaun provins na nau mi stap long Kimbe long Wes Nu Briten provins.

Mi laik sapatim pas bilong brata Gregory Lapan bilong Vanimo i bin kamap long *Wantok Niuspepa* long 8 Ogas.

Brata i tok long no ken mekim rot i bungim Vanimo na Jayapura long Indonesia hariap. Mi tu i gat dispela wankain tingting bikos sapos dispela haiwe i kamap, mi save olsem planti bikpela hevi bai kamap long mipela ol manmeri bilong ples.

Mipela i gat ol planti ples olsem long Grin Riva, Telefomin, Amanab, Lumi na ara-

pela moa i stap klostu long boda. Olsem na wanem hevi i kamap, bai mipela ol pipel i namba wan lain long kisim hevi.

Nau i gat planti hevi i bin kamap pinis wantaim ol paitman bilong Wes Irian na ami bilong Indonesia. Ol i save kam insait long asples na pretim ol manmeri bilong ples.

Olsem na dispela hevi i no pinis na mipela ol manmeri bilong boda i save pret yet i stap.

Mi ting sapos gavman i toktok gut wantaim ol manmeri bilong ol ples i stap long boda eria bai i orait.

Martin Molpo
KIMBE

Raitim stret nem na adres bilong yu long ol pas. *Wantok* i no inap printim ol pas we i no gat nem na adres long ol.

Kaving nating i tanim olsem pukpuk tru

LONG bipo tru, long hap bilong Sandaun provins i gat wanpela liklik han rot i go daun long wara. Na long dispela ples ol lain man i save stret long sapim kaving long diwai.

Long wanpela taim ol i sapim wanpela diwai bilong galip na makim piksa bilong pukpuk. Ol i sapim diwai ya pinis na putim stret long haus bilong ol yangpela manki.

Long wanpela moning olgeta manmeri i go raun long bus long painim abus bilong mekim kaikai long dispela diwai. Ol i wok long painim ol abus olsem pik, kapul na ol arapela abus bilong wara. Sampela i go long ol gaden bilong digim ol kaikai. Dispela ples i stap klostu long maunten Polosal.

Taim ol man i stap aut long wok bilong ol, dispela diwai pukpuk i stat long tanim em yet i go i kam.

Em i mekim olsem i go inap em i tanim na kamap olsem pukpuk tru. Em i kirap na klap i go daun na painim ples bilong ranawe.

Em i wokabaut bihainim rot i go long nambis. Taim em i kamap long nambis, em i tanim bek na lukim maunten we em i bin ronawe long en. Maunten ya i stap bihain long em long hap bilong san kamap.

Orait em i lusim dispela hap na i go olsem long Sandaun. Taim em i kamap long wanpela wara ol i kolim Puian, em i tanim na lukluk i kam bek gen. Maunten ya i stap ples klia yet olsem na em i wokabaut i go moa yet.

Em i wokabaut i go moa na kamap long tupela wara gen long Oweiari na Wiliei. Olgeta



taim em wokabaut i go, bai em i tanim na lukluk bek long maunten em i bin ranawe long en.

Em i go kamap long wanpela wara gen ol i kolim

Chiyipala. Taim em i tanim em i no moa lukim dispela maunten.

Em i go het yet na kamap long las wara ol i kolim Yulu-muia na nau em i stap long

en. Nau ol i save kolim dispela pukpuk, Puai Cholomon.

Em i kirap long Is na stap nau long Wes bilong Manus.

Ignasius Kalai
LORENGAU



Tupela marit Kerema i save stap long Mosbi. Man bilong meri i kisim wanpela kain wok we em i save wok long Sarere tu.

Olgeta Sarere em i save wok na long wanpela taim, meri bilong em i stap long haus na em i les nau em i lokim dua na karim ki wantaim em i go lukim ragbi.

Man ya i pinis long wok long 5 klok na kam bek long haus. Taim em i kamap em i painim olsem dua i lok. Em hangre tu na em belhat nogut tru.

Em i wet i go meri i kam bek. Meri bilong em i kam longwe yet na man ya i singaut, "Hei! Hei, veri yu fini we?"

Meri bilong em bekim, "Ah! Vi fara i ko vasiv rakivi lo Foroko ia.....olketa tivi Foroko Foroko furu sit ol i fakive yu filis"

Desmond Sesevo
Kiunga

Wanpela manki Sepik i laik rait i go long brata bilong em long Rabaul.

Em i raitim pas pinis na long envelop em i putim edres olsem:

To: Mista Poul Gavry

Toboy Shipping Rabaul

Aninit long dispela bai em i putim boks namba tasol em i lus tingting. Em i traim i go no gat em i kisim nupela envelop na raitim:

To: Paul Gavry

Toboy Shipping Rabaul

P.O.Box PAINIM WANTOK GIVIM.

Man ol lain long pos opis i lukim na lap nogut tru.

Amos Draps

KIMBE

Wanpela taim tripela manki Sepik go raun long taun long bik moning yet. Ol raun i go na hangre bagarapim ol tripela stret.

Ol tripela i go insait long haus kaikai na baim rais na mekim save long kaikai i stap.

Kaikai i pinis na wanpela i no pulap yet olsem na em tokim narapela.

"Gaindu, go tokim ol susa long givim mi sampela paia rais gen".

Mi laik skul yet tasol pren bilong mi laik marit

Dia Lalplain,

Mi statim trening bilong mi nau tasol na pren meri bilong mi pinisim bilong em pinis. Mitupela bin raun wantaim stat long las yia na em i tokim mi olsem mi mas maritim em taim mi pinisim skul bilong mi.

Tasol mi tokim em olsem mama na papa bilong mi laikim mi wok sampela yia pastaim bihain na marit. Taim mi tok olsem long em i tok em i no laik long wet. Mi bin tokim mama na papa long tingting bilong pren meri bilong mi na ol i askim mi long lusim em.

Tasol em pren meri bilong mi na em save lukautim mi gut tru. Em save helpim mi long planti samting. Mi no laik long givim bikpela hevi long mama na papa bilong mi. Na tu mi no laik long lusim pren meri bilong mi.

Bai mi wokim wanem?

WHICH WAY.



Dia Pren, Mipela save long wanem hevi bilong yu. Bikos yu no laik long givim het pen long pren meri bilong yu na tu mama na papa bilong yu.

Pren meri bilong yu lukim olsem em inap long marit bikos em i pinisim skul bilong em. Long dispela as em laikim maritim yu sapos yu pinisim skul bilong yu.

Pren meri bilong yu i

lukim olsem em i gat rait krismas bilong marit olsem na em i

laik marit. Ol mama-papa save long hevi bilong marit olsem na ol i tokim yu long pinisim skul. Na wok sampela yia pastaim yu ken painim gutpela meri na maritim.

Bikos meri na man i mas pasim tingting long lukautim famili sapos tupela i kamapim pikinini. Tu ol famili bilong yu save olsem yu laikim pren meri bilong yu tumas. Tasol wanpela meri bai

yu laikim moa na tu em i laikim yu mo taim yu pinisim skul. Na em bai kamap gutpela meri bilong yu long bihain taim.

Mi laikim yu mas save long trupela laik bilong manmeri pastaim. Na laik we i ken strongim marit bilong yu wantaim narapela meri. Sapos wanpela man i laikim marit em bai soim olgeta laik long em. Na i no gat narapela man o meri.

Sapos man o meri i gat laik long ol yet tupela bai laikim tupela yet. Na wokim olgeta samting long soim laik bilong tupela yet. Man bai helpim meri na meri bai helpim man sapos tupela i gat hevi.

Yu i mas stap na lukim laik bilong pren meri bilong yu.

LAIP LAIN



Kisim presen • Prins Andrew i kisim bonara na spia long wanpela lapun Goroka olsem presen bilong em. Prins i karim ol dispela samting nau i go bek long ples bilong em.

WANTOK

NIUSPEPA BILONG OL PAPUA NIUGINI STRET

PABLIK NOTIS

Sapos yu laik advertais, teleppn 25 2500 na askim long

PH: Miri Aiori - Ext. 203
John Iagata - Ext. 215
Kosinto Fosagu - Ext. 216

PAPUA NEW GUINEA-AUSTRALIA COLLOUIUM TRADE INVESTMENT PROMOTION AND RESOURCE DEVELOPMENT

BIKPELA kibung wantaim Australia na Papua Niugini Praim Minista bai kamap long Lae Teknikel Koles long Lae long 24 na 27 Septemba, 1991.

Dispela kibung bai kamap bihainim rot em olupela Praim Minista long 1987, Paias Wingti i bin stretim wantaim Australia Praim Minista.

Insait long 1987 bung, Paias Wingti i bin sainim tok orait wantaim Bob Hawke pinis long strongim bung wantaim bilong tupela kantri. Dispela tok orait i lukluk insait long strongim ol wok na pren wantaim insait long tupela kantri wantaim.

Bai dispela bung i toktok long ol hevi insait long rot bilong helpim narapela wantaim save na skul, wok bung wantaim long ol wok developmen na arapela senis em tupela kantri wantaim i mas save long en. Narapela tu em long ol eria i no gat planti manmeri i laikim long en.

Bai tupela kantri wantaim i traim long bungim tingting wantaim long ol wok bilong bisnis, trening long wok na arapela bikpela wok developmen tu wantaim.

Bai Praim Minista Robbie Namaliu i opim dispela bung long Trinde 25 na Australia Minista bilong Tred na Ovasis Developmen, Hon N. Blewett bai pasim long Fraide belo long 27 Septemba.

Insait long dispela bung tu, bai ol i toktok tu long kirapim:

- Tred na Invesmen insait long PNG na Australia.
- wok maining na Ekonomik Developmen.
- kirapim Invesmen na liklik han bisnis.
- ol senis i save kamap long wok bilong maining long ol manmeri.
- Humen Risos Developmen.

Raun bilong Praim Minista long Australia long dispela yia, i strongim na sapotim tu dispela kibung long kamap long toktok long ol dispela samting.


Olgeta samting bai stap long Lae Teknikel Koles long bikpela haus bung bilong skul. Dispela bai stat long Trinde 25 Septemba.

All are most welcome:

Contact: Donna Lovett
Until Friday, 20th September, 1991 - 267397
From Monday, 23rd September, 1991 - 434201

SALE

SELECTED PNG TITLES



Pictorial History Of Papua New Guinea
was 24.95
now 16.50




First Contact
was 24.95
now 12.00




Day That I Have Loved
was 4.50
now 1.00



Frank Hurley In Papua
was 25.00 now 19.80




Lost Paradise
was 24.95
now 7.50




Mammals Of New Guinea
was 79.95
now 58.00

Faces And Voices
was 25.95 now 8.25



Wings Of Gold
was 35.00
now 19.95

Pathways to Independence (PB)
was 9.95
now 1.95




Between Two Nations
was 11.50
now 1.65

Pathways To Independence (HC)



was 24.95
now 3.95



was 9.95
now 6.95

OPENING HRS

Mon to Fri 9.00am to 5.00pm
Sat 9.00am - 12.00 noon

THE UNIVERSITY BOOKSHOP (P.N.G) INC.

Box 114, P.O., University PAPUA NEW GUINEA Phone: 26 7375 Fascimile: 26 0961

Word Publishing

I go het wantaim PNG

Ol Engliken, Katolik,
Lutheran na Yunaitet
sios i amamas long
bung wantaim long
wokim ol nius



WANTOK

NIUSPEPA BILONG PAPUA NIUGINI STRET

PNG's Tok Pisin newspaper

THE TIMES

of Papua New Guinea

PNG's award winning newspaper



PNG
BUSINESS

Vol 210

Audited Distribution 1173

reporting on the business community



SPORT

Weekend

for complete sport coverage

Ol 2 milien memba bilong Engliken, Katolik,
Lutheran na Yunaitet sios i amamas long stap
olsem papa bilong dispela wok long
kamapim ol nius



SOFBAL

Madang Sofbal Asosiesen i statim pinis nupela sisen



OL sofbal pilaia bilong Madang taun i statim pinis sisen propa bilong Madang sofbal resis, tupela wik i go pinis.

I gat 30 tims olgeta i stap insait long resis we i gat 4-pela divisen olget long pilai. Ol divisen ya em junia man, B Gret man, A Gret man na meri.

Ol tim i stap long dispela 4-pela divisen em, Kabui, Wata Bot, Nutaun, Tarangau, Karanas na Malenesien.

Long B Gret em, Khin

Hill, Kabui, Karanas, Wata Bot, Nutaun na Bismak. Long resis bilong ol meri em, Kabui, Karanas, Wata Bot, Tarangau, Royels, Watabag Yunaitet sista, Kalibobo, Melenesien, Karau na Godawan.

Tresera bilong Madang Sofbal Asosiesen Joseph Zare i tok, klap rejistresen fi em K120. Dispela em fi bilong ol klap i gat tupela tim bilong pilai. Ol klap i gat wanpela tim bai baim tasol K80.

Em i tok rejistresen fi bilong ol pilaia em K6. Sapos ol pilaia i no baim ol dispela fi na rejistresen inap long 23 Oktoba, bai ol i lusim poin long klap bilong ol.

Ol tim i mas i gat namba long yunifom bilong ol bai ol ripota na opisel i ken luksave long ol long namba na kolim nem stret.

Long Sande Karau mekim save long Godawan wantaim 12-8 skoa. Ol meri i go pas long win bilong Karau em pitsa Susie,

Lucy Kamanambu, Miriam Au, Mary Paul na Rose. Alphonsia, Maria, Philo na Margret i trai hat long Godawan tim.

Godawan i lus bikos top pilaia bilong em, Lydia mal i no bin kam long pilai. Ol i mas painim nupela pitsa tu sapos ol i laik win.

Wata Bot kapsaiatim baket wara long Nutaun wantaim 9-1 skoa long A gret resis bilong ol man long Sande apinun. Arapela risal i no redi yet.

Solomon stail • Meri ya i makim Solomon Allan long sofbal tim long Saut Pasifik gems. Ol i no pilal strong na PNG i winim ol

Ol man na meri tim bilong PNG i winim ol gol long sofbal

MOA long 1000 man-meri i bin kamap long Bisini Oval long lukim Papua Niugini meri daunim Ameriken Samoa long sofbal gran fainal bilong 9th Saut Pasifik Gem.

Ol meri Papua Niugini i soim olsem ol i ken lukautim graun bilong ol yet. Na wanpela man or meri bai i no inap daunim ol na kisim dispela taitel bilong sofbal i go aut. Long dispela as tingsting ol i sanap strong na

daunim wanem kantri husat i traimegensim ol. Las wik Fraide 13 Septemba ol i daunim ol meri Westen Samoa 5-2 long ful taim.

Dispela skoa i kamap bikos i gat gutpela pitsa na tu we ol i paitim bal gutpela moa long ol beta bilong Westen Samoa.

Long Trinde apinun ol meri Papua Niugini i soim ol meri Ameriken Samoa olsem sofbal em i no nupela pilai

long Papua Niugini.

Olsem na ol i bagarapim stret ol meri Ameriken Samoa 12-3. Ol meri Papua Niugini olsem ol i gat strong long pilai wanem intanesenel gem long wantaim ol bikpela kantri.

Papua Niugini meri i winim pinis gol long winim ol meri Samoa. Fainal bilong ol man em Papua Niugini i daunim tu Ameriken Samoa.



• Nancy Pala em wanpela pilaia bilong Bismark tim long Lae. Piksa ol i kism taim Lae i kam pilal long Mosbi long nesene sempionsip long dispela yia. Nancy em wanpela memba bilong PNG tim long Saut Pasifik gems



BENSON and HEDGES

Gren fainel bilong Madang soka bai kamap long wiken

BIKPELA nois tru bai kamap long Madang soka graun taim 5-pela divisen i bung long soka gren fainel bilong ol long Sarere 21 Septemba.

Ol 5-pela tim wantaim bai holim gren fainel bilong ol wantaim long dispela Sarere. Presiden bilong MSA, Peter Angasa i tok bai pilai i stap long YC Graun.

Em i tok pilai bai kamap long Sarere bikos ol i laik bai olgeta manmeri i kam na lukim. Na tu bikos long Sande, bai i gat gren fainel bilong ragbi tu long Madang.

Em i tok soka gren fainel bai kamap long Sarere na ragbi long Sande bai i no ken brukim ol manmeri i go

tupela hap. Ol i ken lukim narapela long Sarere na narapela long Sande.

Peter Angasa i tok ol bai yusim graun bilong YC long pulim sampela mani long geit. Dispela mani em bilong helpim na salim skwat bilong Madang i go pilai long Momase Rijenel Tona-men long Vanimo long mun Okotba.

Ol 5-pela tim husat bai pilai em long Anda 19 divisen, PX Air Niugini bai bungim ol kas bilong Wasikia. Long namba wan divisen, Panufun bai bungim na traime bun bilong Wasikia. Long resis bilong primia risev, Momase bai bungim na traime pawa bilong Mimlon.

Pilai bilong primia risev bai givim tu sampela tingting long ol tupela primia tim bilong ol. Bikos tupela klap ya yet bai bai i bung gen long gren fainel bilong primia divisen. Nem bilong tupela tim bilong ol meri i no kamap klia.

Peter Angasa i tok Momase i gat gupela na strongpela beklain bilong em. Ol bai strong tru long pasim banis bilong ol long Mimlon. Ol beklain bilong Momase olsem, Rudolf Arugani, John Benu, Enes Hago na Bebi John. Tupela pilai bilong Momase, Alfred Gabong na Victor Kasen i stap long Saut Pasifik Gem long Lae.

Sapos Momase yet i mekim liklik rong long beklain bai gol i kamap. Tasol sapos ol i mekim gupela was tru, bai i Mimlon i no inap long brukim banis na i go insait.

Tasol Mimlon tu i gat gupela na strongpela pilaia long midfil. Ol yangpela manki olsem James Markili, Billy Dewong. Long straika bai, Bonny na Paul Banjo i traime olgeta strong bilong tupela long brukim tru umben bilong Momase.

Tupela pilaia ya, Amos Romo na George James bai lukautim na bosim ol manki bilong tupela long Mimlon long dispela Sarere. I gat bilip olsem Mimlon bai winim dispela gren fainel bilong Madang soka primiasip taitel bilong 1991.



• Wanpela tim bilong ol meri i pilai long Blue Kumuls tonamen long Rabaul long wiken. Dispela pilai i kamap long makim skwat bilong Rabaul long pilai long Blue Kumuls tonamen long Kiunga long Westen provins

Ashley bai helpim Solomon long winim gol

PAWA bilong olpela soka straika bilong Mosbi Sobou, Charles Ashley i helpim asples tim bilong em, Solomon salensim Fiji long winim gol medal long tumora. (Fraide Septemba 20)

Solomon i winim namba wan ples long gol-medal resis taim ol i autim olpela sempion, Nu Kaledonia 4-1. Na Fiji i daunim lain bilong Noel Vari na Russel Nari - Vanuatu 2-1.

Wanpela gol bilong ol Vanuatu egens long Fiji

i bin kamap yet long boi nogut ya, Noel Vari.

Tude, Vanuatu na Nu Kaledonia bai resis long husat tru bai winim bronz medal. Na long tumora, Fiji bai skelim strong bilong ol boi Solomon.


Insait long dispela ol tupela gem, Vanuatu bai winim yet Nu Kaledonia. Maski Nu Kaledonia i sempion, Noel Vari na ol wantok bilong em i gat liklik strong yet.

Long 1987, Vanuatu i no laki tumas. Ol i lus

long PNG long kik resis bilong bronz. Nu Kaledonia i winim Tahiti na kisim gol medal ya.

Tasol tude, Vanuatu bai soim tru ol soka sapota olsem ol tu i gat nem long kik. Ol Nu Kaledonia i mas was gut. Sapos ol no redi, umben bai pairap klostu klostu ya.

Long Fraide, midfil bilong Solomon Ailan i holim ki. Ashley na tupela arapela poroman bilong em i mas was gut na banisim ol dispela mak ya.



• Wanpela tim bilong ol man i pilai long Blue Kumuls tonamen i bin kamap long Rabaul long wiken long Rabaul. Gem i bin kamap namel long ol man na meri wantaim. Ol meri Rabaul i winim Kokopo na ol man Kokopo i winim Kerevat

1991 i namba wan yia bilong Hagen Soka Asosiesen...

I no gat pait long bagarapim gren fainel tasol ol opisel bilong Asosiesen i laikim bai wankain samting i mas kamap long ol yia i kam

HAGEN Soka Asosiesen (HSA) i tingim 1991 olsem gupela yia bilong em long ol arapela yia bipo.

Presiden bilong HSA, Kemai Saiiau i tok 1991 i bin gupela yia bilong Hagen. Ol i bin pilai soka gut tru na pinisim wantaim gupela pasin bilong gupela spotman na meri.

Mista Saiiau i tok Saut Pasifik Gem i bin kamapim sampela senis insait long gem bilong ol. Em i tok gem bilong ol i save pinis long Novemba long olgeta yia. Tasol dispela yia ol i pinisim sisen long stat bilong mun Septemba. Dispela em long givim sanis long ol manmeri i go lukim pilai long Lae na Mosbi.

Em i tok ol i save pilai long tripela raun bilong propa sisen tasol long dispela senis, ol i pilaim tasol tupela raun.

Long yia bipo, HSA i save gat moa long 12-pela klap. Long las yia i gat 12-pela klap long pilai. Tasol namba i kam daun long dispela yia long 10-pela tasol.

Insait long 10-pela klap ya, i gat 4-pela divisen bilong asosiesen. Ol divisen ya em, primia, wimens, namba wan na namba tu divisen. I gat Anda 16 na 14 divisen tu bilong ol yangpela skul manki.

Presiden i tok i no gat ol bikpela hevi i kamap long dispela yia long gem. Ol i bin pilai gut tru na olgeta manmeri i amamas wantaim. Hagen i bin salim ol tim bilong em i go insait long ol bikpela tonamen bilong nesenel resis.

Em i bin salim Anda 16 tim bilong em i go long Enga long mun Julai long Nesenel Anda 16 Tonamen. Hagen i bin mekim gut tru long dispela tonamen na kisim sampela prais bilong dispela. Sampela manki bilong Hagen i makim Hagen na stap long Nesenel Anda 16 tim bilong PNG.

I gat tupela meri bilong Hagen tu i stap long Nesenel Wimens tim long Australia. Tupela meri ya em Hellen Mapun na Rose Leo. Narapela man tu em Clement Anisana husat tu i stap long PNG tim bilong SP Gem long Lae.

Kemai i tok olgeta yia, Hagen i wok long kamap wantaim soka gem bilong em. Em i tok long 1989 taim em i stat olsem presiden bilong HSA, ol i bin mekim gut tru i kam. Soka insait long Hagen i wok long kam antap na senis i go gupela long olgeta yia.

Wanpela hevi tasol em Hagen i lukim olsem i stap yet em referi na kosa. I no gat gupela na saveman bilong kosa na referi long Hagen.

B&H

BENSON
and
HEDGES

B&H

Ol bikpela pilai i mas kamap tu long Madang - Sir Serei

GAVANA Jenerel bilong Papua Niugini, Sir Serei Eri i amamas tru long kain pilai ol pilaia bilong PNG i

mekim long bringim kantri i go pas long ol narapela long Saut Pasifik gems. Sir Serei i tokaut long

taim bilong namba 16 independens de selebren long Mande olsem em i amamas tru olsem ol manmeri i

makim PNG long pilai i winim planti medel tru.

Em i tok kain pilai yumi kamapim na ol gutpela samting bilong pilai yumi gat long kantri nau bai givim sans long PNG long salensim Australia na Nu Silan long bihain taim.

Tasol em i tok em i laikim ol dispela kain gutpela ples na ol samting bilong pilai nau i stap long Mosbi na Lae i mas kamap tu long Madang. Em i tok Madang i gat planti ol gutpela nambis na ol narapela samting we taim ol mammeri i go pilai i ken lukim.

Na tu i gat rot long Madang i go antap

long ol provins long hailans we ol man i go pilai i ken bihainim long lukim ol kain kain ples, pipel na ol samting long hailans.

Sir Serei i tok taim dispela i kamap bai pulim planti turis i go long Madang. Em i tok ol pipel bilong Madang i laikim Madang ples balus i kamap olsem wanpela intanesenel ples balus. Na wanpela askim bilong ol nau i stap long gavman.

Em i tok gavman i noken sindaun antap long dispela askim bilong ol pipel. Em i mas hariap na mekim ples balus i go olsem wanpela intanesenel ples balus.

Basketbal tim bilong ol PNG man lus tasol meri gat sans long fainel

BASKETBAL tim bilong Papua Niugini man i pinis namba tri long poin lata bilong Saut Pasifik Gem, basketbal resis.

Mak bilong SP Gem long basketbal i orait tasol long namba 1 na 2 long go insait long semi fainel. Olsem na basketbal tim bilong ol man long PNG i no gat sans bikos ol i kamap tasol long namba tri.

Wanpela kodineta bilong basketbal, Bob Brown i tok PNG tim bilong man i no gat sans long pilaim wanpela medel.

Long las wik Fraide, PNG tim bilong man i bin winim gem bilong em namel long Nu Kaledonia wantaim 93 basket na Nu Kaledo-

nia long 59 basket.

Bob Brown i tok tasol tim bilong ol meri i gat sans long winim wanpela medel. Tim bilong ol meri PNG i stap namba wan long lata. Em bai i bungim Fiji long aste. Risal i no rediyet.

Em i tok sapos tim bilong ol meri i winim Fiji, em bai pilai long gol na silva medel long Fraide. Sapos em i lus long Fiji, em bai pilai long brons medel tasol.

Long gem bilong ol man long pul A, Guam bai bungim Frens Polenesia na long pul B, Ameriken Samoa bai bungim Western Samoa. Dispela em semi fainel resis bilong ol man long basketbal.

Sikspela gol medel i dai long boksing tim bilong PNG

OL boksa bilong Papua Niugini tim i autim pinis 6-pela gol medel long las wik Saut Pasifik Gem long Lae.

Ol paitman bilong PNG long boksen i bin mekim gut tru long pait rasis bilong ol long las wik i kam. Ol i bin soim stret na apim tru nem bilong Papua Niugini long resis bilong boksen.

Insait long pait bilong Lait Flai Weit, Washington Banian bilong PNG i bin mekim strongpela pait tru long gol medel na autim. Nem bilong man em i pait wantaim i no kamap klia.

Long Flai weit, Ronny Noan bilong PNG i mekim save wantaim paitman bilong Western Samoa, A. Taviaara. Insait long dispela pait,

Ronny i winim Taviaara long pouts.

Manki Buang bilong Morobe provins, John Sam i bin autim tiket bilong E. Calvo bilong Guam long pait bilong Bantam Weit na autim gol medel. John i bin soim tru strong bilong em long dispela taim long autim dispela taitel.

Tinge Metta bilong PNG i pait long Lait Welta Weit taitel wantaim F. Senfale bilong Western Samoa. Metta i no givim sans long Senfale na autim gol medel long dispela pait.

Long Lait Weit divisen, Henry Kungsi bilong PNG, i no givim sans long Bitiai bilong Solomon Ailan. Em i winim gol.

Narapela strongpela

man tu em Moses Kelets bilong PNG.

Em i autim gol medel taitel tu long Welta Weit divisen. Em i pait wantaim U. Tiatia bilong Amerika Samoa. Dispela pait i bin strongpela tasol het bilong Kelets i pas pinis long gol medel, olsem na em autim Tiatia wantaim pouts.

I gat 12-pela divisen bilong boksen olgeta insait long dispela Saut Pasifik Gems bilong boksen. Papua Niugini i bin kamap namba wan wantaim 6-pela gol medel olgeta. Namba tu em Tonga wantaim tripela gol medel na namba tri em Amerika Samoa wantaim wanpela gol medel tasol.

PNG i no gat sans long winim gol long soka

SEMI Fainel bilong Saut Pasifik Gems long soka i stat long dispela wik wantaim 4-pela kantri tasol.

Ol 4-pela kantri ya em, Solomon Ailan, Nu Kaledonia, Fiji na Vanuatu. Ol i bin winim ol gems bilong ol na stap namba wan na namba tu long wan wan pul bilong tupela. Long pul A em Solomon Ailan na Vanuatu na long pul B em Fiji na Nu Kaledonia.

Insait long dispela semi fainel, Vanuatu bai pilaim Fiji na Solomon Ailan bai pilaim Nu Kaledonia. Tupela wina bai pilai long gol na silva medel

na tupela tim i lus bai pilai long brons medel.

Tonamen Dairekta, Dokta Malai i tok i gat tupela pul long dispela tonamen. Wanpela pul i gat 4-pela tim na narapela i gat 4-pela tim tu i pilai long en.

Long makim ol tim long pilai insait long ol fainel raun, ol i makim tupela top tim bilong wan wan. Pul A, Solomon Ailan na Vanuatu. Na pul B em Fiji na Nu Kaledonia. Em ol tim i stap antap long poin na leta.

Long pul A, tim i ron namba wan, Solomon Ailan bai pilai wantaim tim i ron namba tu long pul B, em Nu Kaledo-

nia. Na tim i ron namba wan long pul B Fiji, bai pilai wantaim tim i ron namba tu long pul A em, Vanuatu.

Dokta Malai i tok bihain long ol dispela kik, bai tupela tim i win long tupela gem ya bai bung long fainel. Wina bilong tupela bai kisim gol medel na usa bai kisim silva medel.

Narapela tupela tim i bin lus long tupela tim ya bai bung na pilai long winim brons medel.

Long Fonde gem bilong pul B, Nu Kaledonia i bin autim tiket bilong Guam wantaim Guam wantaim 18-0 skoa.



• Iamo Launa i kamapim gen nem bilong PNG long dispela Saut Pasifik gems. Em i winim wanpela gol medel bilong PNG long pilai ol i kolim jvelin o tromoi spia. Dispela i no namba wan taim iamo i kisim gol bilong PNG. Em i bin makim PNG long planti ol Saut Pasifik Gems pinis. Dispela gol em i kisim nau i mekim namba bilong ol medel em i winim long ol yia i kam. Planti ol lain bilong em i lusim pinis gems, tasol em i stap yet. Long piksa em i sanap namel long tupela narapela meri long Sir John Guise stadium long las Sarere nait taim em i kisim gol medel bilong em.

Ezekiel Wartovo i winim olgeta rana long Pasifik long 100 mita

PAPUA Niugini i winim gol na silva medel wantaim long 100 mita resis fainel bilong ol man long ran.

Saut Pasifik Gem 100 mita resis fainel ran bilong ol man i stap pinis long han bilong PNG.

Tupela spit man bilong PNG i bin brukim tru rekot bilong 1991 SP Gem long kamap namba wan na namba tu long fainel. Tupela spitman ya wantaim bilong Tolai, Ezekiel Wartovo na Takale Tuna.

Long dispela fainel ran long las wik, Ezekiel i abrusim olge-

ta rana bilong Saut Pasifik kantri long kamap namba wan wantaim 10.8 sekens. Takale Tuna i bin kamap namba tu long Ezekiel wantaim 10.92 sekens.

Ezekiel i stap nau olsem wanpela spitman insait long Saut Pasifik kantri long brukim dispela rekot bilong 9th SP Gems long 100 mita resis.

Takale tu i wanpela olupela na saveman bilong ron long dispela kain resis na i no givim sans long rana bilong Fiji, Delai Jone husat i kamap namba tri. Delai Jone i kamap wantaim 10.93 sekens long

Takale. Em i kisim brons medel long kamap namba tri.

Ezekiel i kisim gol medel na Takale i kisim silva medel. Delai Jone bilong Fiji i kisim brons medel long kamap namba tri.

Wanpela strongpela rana bilong Papua Niugini tu i bin kamap namba 4 long dispela fainel ran. Man ya em Subul Babo. Tasol Subul em brukim rekot tu long resis bilong 400 mita fainel long kisim gol medel. Namba tu long en em Takale Tuna wantaim silva medel.

Long 100 mita fainel

bilong ol meri, Elizabeth Kamilus bilong PNG tu i bin mekim gut long dispela resis. Em i bin kamap namba tu long rana bilong Nu Kaledonia, Kamin Edith husat i go namba wan long olgeta.

Elizabeth i bin skorim 12.73 sekens long taim bilong em bihain long Kamin husat i skorim 12.86 sekens long taim bilong em.

Bikpela amamas tru i go long ol dispela lain PNG long winim gol na silva medel long dispela bikpela resis, planti manmeri i laikim long en.



• Wanpela rana bilong PNG, Elizabeth Carmilus i pundaun bihain long wanpela resis long Sarere nait long Sir John Guise stadium. Ol lain bilong Ret Kros i stap klostu long helpim em

Ovasis gem bai helpim PNG long basketball

KAIRU LAHO i raitim

PAPUA Niugini basketbal tim bilong ol man i no bin holim sampela ovasis trening gem long redim em yet long kain bikipela pilai olsem long SP Gems.

Dispela em ol toktok bilong Jenerel Seketeri bilong Osenia Basketbal Konfederesen, Al Ramsay. Ramsay i mekim dispela tok-tok bihainim lukluk bilong em long basketbal tim bilong ol man na meri insait long tupela wik bilong pilai.

Em i tok PNG i gat ol longpela na strongpela man long pilai basketbal tasol ol i no kisim sampela strongpela gem resis wantaim ol ovasis kantri yet. Sapos PNG tim i ken go kisim sampela gutpela trening long ovasis kantri, bai dispela i ken givim gutpela trening long ol pilaia long ol kain bikipela resis olsem long Saut Pasifik Gems.

Ol kantri olsem Guam i save tren wantaim Amerika long sip bilong ol Nevi. Ol dispela sip i save kam sua long nambis na ol Amerika i save holim basketbal

gem wantaim ol pilaia bilong Guam.

Olsem na kantri olsem Guam na arapela kantri long Pasifik i ken luksave long stail na strong bilong basketbal gem long ol bikipela kantri.

Ramsay i save stap long Australia. Na em i tok PNG i stap klostu long Australia na i mas tren wantaim Australia.

Ramsay i tok ol opisal husat i save givim planti helpim long basketbal i mas kisim ol ovasis trening tu. Dispela em long helpim na kamapim gutpela na strongpela

edministresen bilong basketbal insait long kantri.

Ol i toktok pinis long salim edministreta, Iaita Gigimat i go long wanpela ovasis trening long wok edministreta. Em bai mekim sampela wok long Osiana Konfederesen opis long Kof Habas, Nu Saut Wels na tu long Nu Kasel opis. Dispela opis i lukautim moa long 500 tim husat i save pilai long olgeta wik.

Ramsay i givim bikipela tok amamas i go long olgeta lain husat i wok wantaim long SP Gems. Em

i tok wantaim gutpela na nupela ples na hap bilong pilai, bai i gat sans long sampela ovasis gem i kamap long PNG long taim bihain.

Na basketbal inap pulim mani bilong helpim long salim ol tim i go long ovasis trening na kos long taim bihain.

Em i askim ol opisal na komiti bilong basketbal long PNG long wok wantaim na sanapim wanpela fultaim wokman olsem Edministreta bilong basketbal long kantri.

PAPUA Niugini i go pas yet long arapela kantri wantaim planti medel long 9th Saut Pasifik Gems.

KANTRI	GOL	SILVA	BRONS	TOTOL
Papua Niugini	34	19	17	70
Frens Polenesia	16	13	15	44
Westen Samoa	16	13	6	35
Nu Kaledonia	11	18	14	43
Amerika Samoa	8	4	6	18
Guam	5	4	10	19
Fiji	4	17	16	37
Tonga	3	2	4	9
Vanuatu	3	2	1	6
Nauru	3	-	-	3
Kuk Ailan	1	4	4	9
Solomon Ailan	-	4	11	15
Walis en Futuna	-	3	5	8
Notfork Ailan	-	3	2	5
Masel Ailan	-	-	-	-
Niue	-	-	-	-
Noten Mariana	-	-	-	-



• Slaman bilong Saut Pasifik Gem Faundesen, Barth Philemon i hangamapim wanpela gol medal long wanpela wina long Sarere nait. Long dispela taim moa long 15,000 manmeri i bin kamap long lukim planti resis long Sir John Guis Spots Stadium long Waigani.

Nu Kaledonia bai winim ol gol tude long resis long bot

FAINAL raun long sel long bot bai kamap long tude, Fonde 19 Septemba long Ela Beach.

Nau yet long skoa i soim olsem Nu Kaledonia bai holim pasim wanpela gol medal long tude. Sempion bilong Nu Kaledonia na wol sempion Michelle Quintin i gat bikipela bilip long winim gol medal long resis bilong ol man.

Micelle i go pas long skoa long 8 poin. Na namba tu long dispela resis em Tony Philp husat i kisim 10.5. Paul Halbedal bilong Nu Kaledonia i stap long namba tri ples long 24 poin.

Long heviwet divisen bilong ol man, J. Levis Colmas bilong Nu Kaledonia i go pas long 7.75 na pren bilong em long Nu Kaledonia yet, Laurent Gauzere i kam namba tu long 10.25 poin.

Namba tri ples em, Papua Niugini Graham Numa husat i kisim 14 poin. Gutpela sans

bilong Graham long winim bronze medal long tude, Fonde 19 Septemba sapos em i stretim olgeta hevi em i gat long sel long tude.

Narapela sela bilong Guam John Iriate i kam namba 4 wantaim 16 poin. Na Kevin Pini bilong Papua Niugini i ran bihain long namba 5 ples long 18 poin.

Long divisen bilong ol meri em Elizabeth Dabin bilong Nu Kaledonia husat i sempion bilong dispela resis. Em i kamap namba wan long resis ya wantaim 7.75 poin. Na bihain long Dabin em Cathy Moorelin bilong Guam wantaim 18 poin. Na Papua Niugini Fran Ning i ran bihain long namba tri ples long 19 poin.

Fran i putim kamap gutpela resis wantaim ol dispela meri. Na i luk olsem em bai kisim wanpela silva medal bihain long dispela resis. Nau yet em i stap long 19 poin. Na narapela ol meri husat i bin putim kamap gut-

pela gem long las wik em, Linda Yeoman bilong Guam wantaim 25.75 poin na Rachael Watkins bilong Fiji husat i stap long 28 poin. Sandrine Roberts bilong Nu Kaledonia i stap long 32 poin na Cynthia Schubeth bilong Guam i kam long las long 44 poin.

Long Hobis em tim tu bilong Nu Kaledonia husat i stap long namba wan long 17 poin na tim wan bilong em i bihainim long 17.75 poin. Long namba tri ples em tim tri bilong Tahiti 19.75 poin. Na tim wan bilong em i ran bihain long namba 4 ples

long 20.75 poin.

Thurecht na Fiona Tanner bilong Papua Niugini tim wan wokim gut long kamap namba 5 long dispela resis wantaim 23 poin. Fiona na Thurecht i soim olsem tupela ken winim resis bilong Mande. Taim tupela i kam fes long hit faiv resis.

Tupela resis i stap yet na Fiona wantaim Thurecht i lukluk long winim wanpela bilong dispela tupela resis.

Nau yet ol opisal i no wan bel yet bikos i no gat gutpela win bilong resis. Na dispela bai stapim olgeta resis long i go het long tude.



• Spitman blong Pasifik: Ezekiel Wartovo i holim flak bilong Papua Niugini na ron bihain long em i winim 100 mita fainel ran long kisim gol medel.



WANTOK Spot NIUS

GLASIM OLGETA PILAI SAMTING I KAMAP PINIS

KAIRU LAHO i raitim

PAPUA Niugini i no save win long ol Saut Pasifik Gems bipo bikos em i no gat ol gutpela ples na ol samting bilong trening.

Tasol long dispela gem, em namba wan taim tru bai PNG i win. Long las wik i kam inap long 7 klok long asde nait, PNG i go pas wantaim 34 gol, 19 silva na 17 brons. Dispela olgeta i kamapim 70 medel olgeta bilong PNG.

Dispela i kamap bihain long planti mani em PNG gavman i putim wantaim ol kampani i putim mani long kamapim ol gutpela ples na ol samting bilong pilai long kantri. Bikpela wok tu em Porgera Join Venja i mekim long putim mani long lukautim ol pilai bilong PNG.

Jenerel Seketeri bilong PNG Spot Fed-eresen, John Dawanicura i tok dispela i kamap bikos long sapot em gavman bilong PNG wantaim ol kampani i givim long PNG long holim ol dispela gems.

Dawanicura i tok, "Porgera i bin putim mani long ol tim long go trening long ovasis na tu holim ol planti

trening insait long kantri yet. Porgera i baim tu ol nupela samting bilong bilong trening.

Em i tok ol menesmen tim bilong ol PNG tim long bipo i save ripot olsem bikpela hevi PNG i gat em i nogat inap mani, i no gat gutpela samting bilong pilai na i no gat inap trening wantaim ol narapela kantri.

Tasol ol dispela ol samting nau i senis. Gavman i givim bikpela sapot long wokim ol tupela ples bilong pilai, Sir John Guise kompleks long Mosbi na Sir Ignatius Kilage kompleks long Lae. Dispela nau bai helpim ol tim bilong PNG long trening long ol bikpela gem long bihain taim. Na tu PJV i kisim ol kosa bilng ol narapela kantri i kam long lainim ol pilai bilong PNG.

Long namba wan taim em PNG i kisim planti ol medel em long 1971.

PNG i kamap namba tu long Nu Kaledonia. Em i gat 77 medel. Insait long dispela i gat 28 gol, 28 silva na 21 brons. Na long ol narapela gem long 1971 na

dispela yia, PNG i no pilai gut.

Nu Kaledonia i save stap antap tasol long dispela ol 8-pela gem i kamap pinis. Ol narapela kantri bihain long em, em Frens Polinesia na Fiji.

"Gutpela pilai ol spotman na meri bilong yumi mekim i gutpela tru. Yumi tokim long win na ol i mekim," Dawanicura i tok.

Dawanicura i wok wantaim SP Gems stat long 1966 i kam inap nau. Em i makim PNG olsem pilai, bihain olsem tim menensa na nau em Seketeri Jenerel. Em i tok dispela gem em namba wan long ol gem long stori bilong SP Gems. Em tok ol opisal bilong ol narapela kantri i mekim wankain toktok tu.

"Dispela i namba wan gem tru long 1966 i kam inap nau. Ol manmeri i kam lukim pilai i givim gutpela sapot tru. Planti ol narapela kantri i bringim ol namba wan tim bilong ol na ol i pilai gut," Dawanicura i tok.

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.



• Praim Minista bilong Papua Niugini, Rabbie Namaliu i givim brons medal long wangepela meri pilaia bilong Tahiti. Tupela arapela bilong Fiji i bin winim gol na silva medal long 100 mita resis bilong ol meri.

Lukluk bek long 1991 RAGBI LIG sisen - 8 pes insait



• Ol pilai bilong Papua Niugini tim i amamas long lukim ol narapela Pasifik Allan kantri i salim tim bilong resis long namba 9 SP Gems. Tasol long wankain taim, ol i amamas long bilas na so op liklik tu. Dispela em long opim ol pilai long Mosbi. Lukaut gut long wanem samting bai kamap long taim bilong pasim pilai.

Ol paspot i no stret na Westen Samoa aut long basketbal

KOT bilong Apil i sekim pinis paspot bilong tripela pilaia bilong tupela Pasifik allan kantri long taim ol i pilai long Saut Pasifik Gems.

Tripela pilaia ya em Mike Toimie bilong Amerika Samoa wantaim Ray Galeai na Tuaiho Leviao bilong Westen Samoa.

Kot bilong Apil i sekim paspot bilong ol tripela bihainim ol tok kros i bin kamap long sekim na painim ol manmeri husat i kisim tok orait long pilai.

Kot i bin toktok wantaim na sekim tu ol basketbal opisal, Fia Gataloal bilong Westen Samoa wantaim Ken Tupua na Fiii

Malae bilong Amerika Samoa long dispela hevi.

Kot bilong Apil i painimaut olsem Toimie wantaim Leviao i gat tok orait long pilai. Tasol Galeai i no gat.

Mausman bilong FIBA na man i makim SP Gems, Al Ramsay i bin kisim tok save long Kot bilong Apil long dispela hevi bilong man ya na wanem samting em ol i painimaut long en.

Bihainim lo bilong FIBA, ol i bin toktok long stapim basketbal tim bilong Westen Samoa long pilai insait long Saut Pasifik Gem basketbal resis.



RUGBY

Namba 31

Fonde Septemba 19, 1991

NIUS

Foapela nupela Kumul

OLGETA taim dispela manki Sepik Richard Wagambie save driman long putim blak, red na gol jesi bilong Kumul na pilai egensim Australia Kangaroo.

Las yia em i bin putim kamap gutpela gem. Na tu Richard i soim olsem em i ken pilai long olgeta ripresentativ gem insait na tu ausait long Papua Niugini.

Dispela em i soim tru kala bilong ragbi na ol i makim em long pilai insait long Sauten Son na tu long Mosbi Vipers long dispela yia. Richard i bin pilai long Sauten Son long 1986. Na bihain long 1986 em i strongim pilai na holim pasim posisen bilong em.

Olgeta Richard save tingting long putim jesi bilong Kumul. Las wik em i soim nesanel selekta long Sauten Son sait long son sempionsip.

Taim Ragbi Lig Nius i askim Richard long kisim tingting bilong em. Richard i tok olgeta toktok i ranawe pinis long tingting bilong em. Taim em i harim olsem em i winim wanpela spes long Kumul skwat long pilai Australia Kangaroo.

"Mi amamas long ol selekta i givim mi sans long pilai egensim Kangaroo. Na mi bai putim olgeta strong na stail bilong ragbi sapos mi pilai egensim ol long dispela tupela tes pilai," Richard i tok.

Tasol nau em i no wan bel bikos wanpela man husat save givim em bikpela sapot bai i no inap lukim em putim dispela jesi. Dispela man em pren bilong em long wok yet, Miva Koavea husat i dai long Tunde.

Richard i tok laik salim tenkyu bilong em i go long Koavea long olgeta sapot na samting em i givim mi long putim dispela jesi bilong Kumul. Narapela nupela man husat ol selekta i makim em tu long Kumul em pilai tes mets long Goroka em Danny Moi husat i bin stap long Mosbi Vipers

skwat.

Em bai kisim ples bilong Ailan Son pilaia Bernard Bate. Na narapela tupela pilai husat i kamap long Kumul long namba wan taim em Liprin Palangat bilong NGIP Muruks na Korul Sinemau bilong Noten Son.

Na ol olpela pilaia husat i stap yet long Kumul skwat em Ipisa Wanega, Chris Itam, Goie Waine, Stanley Haru, Sam Karara, Daroa Ben Moide, John Unagi, Thomas Daki, Mac Tiri, Joe Gispe, Ngala Lapan, James Naipao na Kes Paglipari.

Stanley Haru bai i go pas olsem tim kepten na Ben Moide bai olsem namba tu.

Dispela tim bai pilai Australia Kangaroo long Sande 6 Oktoba. Na olgeta pilaia i mas kamap long Goroka long Sarere 28 Septemba long trening.

Olgeta pilaia i mas kolim ol dispela opisal long eria we ol i stap long en. Long wokim trening. Hagen - Kevin Murphy, Goroka - Brian Rosanowski, Lae - Gavin Ross, na Rabaul - Santi Margis, Kundiawa - Paul Mason, Mosbi - Lester Manuai. Wanwan pilaia i mas statim trening bilong em long nau Fonde 18 Septemba, 1991.

□ Joe Mirisa bilong Wes i mekim kain stail pilai olsem na ol selekta i makim em long stap insait long Sauten Son skwat long pilai long son sempionsip. Tasol em i no pilai strong long winim No 1 Kumul jesi.



Winfield League '91

Sik ragbi i bikpela long Kiunga

KIUNGA

SAISAME Aragu em i wanpela sik man tru nau.

Dispela winga bilong Magani insait long Kiunga ragbi lig resis em i skindai nating bilong wanem sisen bilong ragbi i pinis na em i nogat wanem samting long wokim long wiken.

Taim resis bilong

Kiunga i pinis Aragu i pilim olsem em i hangre moa long pilal tasol sisen i pinis na i wokim em skindai long wokim ol arapela samting.

Tasol dispela sik i no kamap tasol long Aragu, nogat, i gat planti ol ragbi lig pilaia husat i pilim olsem na stap taim resis i pinis long Western Provins.

Aragu i tok olsem

dispela malolo long ragbi i wokim na skin bilong em i no pilim gutpela bilong wanem em i stapim trening bilong em. Em i tok em i save pilim olsem em i no gat strong.

Aragu i no gat wok na em i save stap nating long ples. Tasol dispela kain hevi i kamap na Aragu i kating long go beck long liklik ples bilong

em klostu long Daru.

Em i tok ating sapos em i go swim long solwara na panim kindam long Torres Strait bai em i pilim orait na sik bilong em bai pinis. Em bai wokim dispela wok na wetim neks yia long stat bilong 1992 sisen.

Tasol maski Sagl Usa, treina bilong Brothers, i wok wana taim Helt dipatmen

long Kiunga em tu i dai tru long pilal taim resis i pinis.

Nogat marasin long Kiunga haus sik inap mekim Usa i orait long sik bilong em.

Usa i tok em bai mas palnim marasim bilong em yet. Dispela marasim em long go insait tru long bus na wokim ol sampela wok na traim long lus tingting long ragbi.

I gat wanpela projek bilong gavman long sanapim ol teng bilong kisim wara insait long ol liklik ples long bik bus.

Usa na ol wokman bilong em i kisim dispela kontrak long wokim ol dispela teng. Ol bai wokabout bihanim wara Fly Inap tupela de bihain bai ol i kamap long ol dispela ples.

Usa i ting olsem dispela kain wokabout na wok bai inap long wokim em lus tingting long ragbi.

Em i tok taim dispela kontrak i pinis

em bai kamap strong moa na fit long redim ol bol Brothers bilong em long resis bilong neks yia.

Presient bilong United klab Joe Wot i tok op sisen em "taim bilong les."

Wot i tok algeta pilaia na kosa i save pilim les and skindai long op sisen.

Em tok rabgi lig em wanpela samting tasol i save amasim ol lain long kiunga.

Wot tok olsem em i no inap wet long 1992 sisen long stat.

Be with your family




...by phone!

Sometimes you don't need to say much. The sound of your voice is often enough to tell them how you're feeling. But isn't it good to know that when the ones you love are a long way away, you can still let them know how you're getting on. You can be together by phone.

With a phone in your home, you are closer to the ones you're close to, for a lot less than you may think.

Call in at your Telecom Business Office, and you'll find out how you can afford a phone in your home.



Kainantu bai pilaim ken gren fainai

KAINANTU

LAS wik Sande 15 Septemba, Kanake Royals na Panthers i traim masel long gran fainai bilong Kainantu Winfield Lig.

Moa long 2000 sapota i kamap long lukim gem. Ol pilaia bilong Panthers i bin putim kamap strongpela gem long fowad taim gem i stat.

Tasol Royals i stapim ol long mak bilong ol yet. Bihain long 11-pela minit i go insait long gem lok fowad bilong Royals, Muna Akila i putim namba wan trai aninit long pos.

Anton Buro abrus long bringim skoa i goap 6-0. Bihain long dispela trai Panthers i kamapim strongpela gem na pusim ol pilaia bilong Royals long kamapim sampela rong insait long mak bilong ol yet.

Refri Plastic Kokorome i lukim wanpela rong kamap long Royals. Dispela rong i givim sans long Mogia Remin long putim narapela tupela skoa gen. Tupela tim wantaim i strong long olgeta posisen. Na ol pilaia i tromoi bal i go kam long insait long fil.

Na Royals i putim strongpela difens na ol i lus tingting long opsait. Refri i lukim na givim sans long Remin long kikim narapela penalti gol. Long bringim skoa i goap long 4-6.

Panthers i soim em i gat strong moa i stap na putim kamap strongpela ran. Dispela ran i givim sans long Junior Sukao long kalap na putim narapela trai long kona. Gutpela kik bilong Remin i bringim Panthers i go het long skoa 10-6. Tupela tim wantaim i putim kamap gutpela gem bihain long dispela trai na skoa i stap olsem i go inap long hap taim.

Bihain long seken hap Royals i putim kamap strongpela gem. Faiv et Steve Namu i givim siksti long putim namba wan trai long bilong hap taim ausait long kona. Gutpela kik em Mokson Baru i mekim na Royals abrusim Panthers long tupela poin 12-10.

Panthers i strong moa long difens na putim narapela trai long bringim skoa i goap 16-12. Long dispela taim difens bilong tupela i kamap strongpela. I no gat sans bilong tupela tim wantaim long putim trai.

Insait long 22 minit bilong seken hap Royals senta Anton Buro putim narapela trai. Long dispela taim Panthers i putim ai long winim gem ya. Na salim Mogia Remin long putim napela trai 9-pela minit pastaim long ful taim.

Tasol tripela minit i stap yet na Royals winga i pundaun wantaim bal long givim sans long Buro kikim konvesen long bringim skoa i goap long 22-22. Pastaim long ful taim tupela tim i putim kamap strongpela gem i go inap ful taim.



POST AND TELECOMMUNICATION CORPORATION
PARTNERS IN 1991 SOUTH PACIFIC GAMES



WAGAMBIE'S

WHIP



Mick daunim Hawks

Son trials i save westim mani

AUSTRALIA Winfield Kangaroo bai kamap long Papua Niugini long Sarere 28 Septemba. Dispela yla Australia Winfield Lig i makim ol gutpela pilaia tasol long pilal raun long Papua Niugini.

Liklik man bilong Kangaroo, Allan Langer bai i no stap long tim olsem na ol sapota bilong em bai i no inap lukim em. Tasol ol sapota bilong Penrith Panthers bai lukim wanpela gutpela pilaia Greg Alexandra.

Australia Kangaroo bai i no inap pilal kaskas long Papua Niugini Winfield Kumul. Ol pilaia bai soim olgeta strong na stall ol lainim long Australia.

Kangaroo i gat nem long wok long ragbi lig. Olsem na ol i mas lukautim ol yet insait long fil. Ol narapela pilaia insait long fil bai traim long daunim sampela pilaia bilong em.

Winfield Kumul i ken daunim strong bilong Kangaroo. Na ol pilaia bilong Kumul i mas gat kain tingting olsem yumi olgeta man i wankain tasol. Na gem bai i stap namel long fil sapos Kumul i putim kamap wankain stall ol i wok long lainim na pilal i stap.

Ol pilaia i mas trolim bai i go kam insait long pulim ol pilaia bilong Kangaroo. Na ol pilaia i no ken traim long yusim bodi bilong ol tumas long taim bilong pilal. Yumi i mas mekim Kangaroo ranim bai olgeta taim yumi hollim pasim bai long posisen bilong yumi.

Ol Kumul pilaia i mas wokim planti kik na tu pasim bai sapos Kumul i gat bikpela laik long daunim Kangaroo. Nem bilong Kumul tim i no kam aut yet. Nupela tim bilong Kumul bai i gat tripela wik long wokim trening bipo ol i pilai egensim Kangaroo long Goroka long Sande 6 Oktoba, 1991.

Mi ting gutpela long ol nesanel selekta i mas makim 20 pilaia tupela mun pastaim long gem i kamap. Na kampani pilaia i wok long en i mas givim ol ful pe. Na lusim ol pilaia long taim long wokim trening.

Na tu ol pilaia i mas kaila gutpela kaila we bai strongim na helpim bodi bilong ol. Planti manmeri na pilaia bai tok olsem dispela em i samting bilong skul. Tasol yupela i mas save olsem olgeta pilaia i bin putim kamap wankain trening olsem long klap level.

Papua Niugini Ragbi Futbol Lig i lusim-nating planti mani long holim son trials long makim ol pilaia long makim Kumul skwat. Dispela em i no gutpela rot tumas long makim ol gutpela pilaia.

Olsem wanem bai yumi lusim olgeta wok i stap inap taim bilong kain intanesenel gem olsem na yumi holim son trials long makim ol pilaia. Narapela gutpela rot long kisim moa skul long pilaia long sampela resis long Sidni. Olsem Louta Atol sampela yla i go pinis. Na taim em i kamap bek long Papua Niugini, dispela trening i helpim em long putim moa masel long leg bilong em.

Planti gutpela pilaia long Sidni i muv i go long Gold Coast long pilal. Gold Coast em i wanpela klap we i gat planti mani insait long Australia. Na tu planti amamas i kamap long gran fainal. Na mi lusim tingting long man husat i lukautim gut gem, Graham Ainul. Em i lukautim gem na i no gat wanpela pait o hevi i kamap.

Olgeta taim sapos Ainul i hollim wisel, olgeta pilaia i save amamas na pilal gutpela gem. Na tu ol sapota bai amamas long lukim gem inap long mani ol i lusim long get fi. Mi laik tok bikpela amamas i go long Ainul. Na mi bai sapatim yu olgeta taim long narapela sisen gen long neks yla.

MT HAGEN

MICK Morisson i kikim fil gol long daunim Hawks 17-16 long holim Strong taitel bilong Hagen Winfield Lig resis bilong dispela yia.

Morisson i putim kamap gutpela gem long hapbek posisen. Em i bin pilaim dispela posisen taim em i makim Junia Hailans Son long 1986 na 1987. Las wik em i pilai gutpela gem long dispela posisen. Na em i kisim "Man of the Match" taitel bihain long en.

Presiden bilong Hagen Winfield Lig, Brian Tapa i tok olsem gran fainal namel long dispela tupela tim i gutpela moa. Na planti yangpela pilaia i putim kamap gutpela gem. Em i gutpela moa long ol narapela gren fainal gem pastaim. Ragbi lig kamap long Hagen long 1960 na 1970. Na planti hevi save kamap taim tupela strongpela tim i kamap long gren fainal. Tasol dispela yia i no gat wanpela hevi i kamap. Bikos 7-pela kosa bilong 7-

pela klap i givim strongpela toktok long ol pilaia.

"Nau yet ol pilaia i mas save long tok "win well na loose well." Dispela tok em i wanpela bikpela toktok na olgeta sapota na pilaia i mas lainim tu long kamap gutpela spot manmeri. Planti manmeri i no save long as bilong dispela toktok. Moa beta olgeta pilaia na sapota i lainim lo bilong ragbi lig na bihainim", Tapa i tok.

Las wik tupela tim i putim kamap gutpela gem i go inap pilai i pinis. Tapa i tok Hawks i gat bikpela bilip long winim dispela gem tasol tupela gutpela pilaia i bin kisim bagarap klostu long ful taim em Micheal Angra na Gabriel Pepna.

Olsem na bikpela spes i stap long posisen bilong tupela na ol pilaia bilong New Taun Jets i kisim taim long brukim difens. Mick Morisson i kikim wanpela fil gol 3 minit klostu long pinis bilong gem long winim Winfield Lig taitel gen bilong dispela yia.

Tapa i tok dispela em i wan-

pela gutpela gran fainal gem long Winfield Lig resis. Na planti opisal bilong Hagen Winfield Lig i amamas bikpela sapot ol sapota na pilaia i soim long taim bilong gran fainal.

Em i laikim long kain pasin olsem i mas i stap olgeta taim long sampela yia bihain taim. Na Tapa i laik mekim bikpela tok amamas i go long New Taun Jets long daunim Hawks na holim pasim dispela taitel long namba tu taim long dispela yia.

Nau yet wok bilong lukautim na amamasim Winfield Kangaroo i go het gut. Na planti kalsarel grup i redi pinis long amamasim ol pilaia bilong Kangaroo long Trinde 9 Oktoba, 1991.

Primia bilong Westen Hailans provins, Lukas Roika i tokaut olsem Trinde em i pablik holide bilong Hagen taun long givim inap taim long ol manmeri long amamasim pilai namel long Kangaroo na Hailans Son.

Roika i givim bikpela sapot i go long Hailans Son long

putim kamap gutpela pilai egensim Australia Kangaroo.

Hia em nem bilong ol pilaia bilong Hailans son husat bai putim kamap strongpela gem egensim Winfield Kangaroo:

Francis Abba, Willie Amos, Dacid Gomia, Leslie Hoffman, Philip Humar, Chris Itam, Mark Ipai, Maima Kawage, John Kingal, Mek Kepo, Sam Karara,

Elias Kamiak, Micheal Kiap, Yami Kamisive, Matthew Midi, John Okil, Dimbi Ongugo, Gigmai Ongugo, John Passingan, Joe Paraka, Joe Raima, Robert Sikipal, Opoe Soga, Agi Tete, Thomas Tumbo, Max Tiri, John Unagi, Goie Waine, Ipisa Wanenga na John Yawing.

Ol opisal em: Kosa Leva Tete, namba tu Kosa em Joe Tokam, Traina Gabriel Kilawa na Menesa em Brian Tapa.

Nau yet Tapa i gat bikpela long ol dispela pilaia bai putim kamap gutpela gem egensim Winfield Kangaroo long 9, Oktoba.

Eels bai autim Hawks

BIKPELA gran fainal gem bilong Morobe Kantri Lig bai kamap namel long Eels na Hawks long dispela wiken.

Na moa long 1000 manmeri na sapota bai kamap long lukim dispela gem long Omili Spots Oval long dispela Sande 22 Septemba.

Las yia dispela tupela tim i bin kamap long gran fainal na Hawks i autim tiket bilong Eels 26-12. Dispela Sande Eels i gat bikpela tingting long bekim dinau.

Na em i putim kamap moa trening na strongim ol liklik hevi tim i gat long en. Nau yet tupela tim wantaim i gat gutpela beklain. Long fowad em ol boi bilong Eels i gat gutpela na inap pilaia long givim sapot long ol beklain bilong em.

Sapos Eels i no kamapim planti hevi long dispela gran fainal bai helpim ol fowad pilaia tu long winim taitel long Hawks. Bikos Hawks i no gat gutpela fowad.

Presiden bilong Morobe Kantri, Kuma Manoba i tokim Ragbi Lig Nius (RLN) olsem dispela tupela tim i bin putim kamap gutpela gem stat long sisen propa. Na dispela i bringim kain pilai bilong tupela tim wantaim i goap.

Long backlain, Eels kepten Eddie Mark bai i go pas long centre. Pren bilong em long centre Gilbert Semion, faiv et Richard Jeff, tupela winga, Philip Ben na Joel Miri na fulbek Jeffrey Steven bai lukautim mak bilong Eels.

Kepten na hafbek bilong Haks Ume Oa i mas lukautim gut skrum bes long rausim bai i go long ol boi bilong em long senta Charles Kampau, Havie Jack na faiv et Dickson Kot.

Long ol fowad, ol bikpela man bilong Eels Joe



□ Kaipel Kanaka bilong Tarangau i traim long aburusim birua bilong em long gren fainal bilong Pot Mosbi tupela wik i go pinis. Tarangau i bin winim Wes.

Makosae, Jonah Ofa, Bire Moe, Max Wartovo na huka Agaro Kuyave bai i go pas long brukim panis bilong Hawks na traim long salim ol winga i go insait long putim trai.

Sapos Peter Nondo, Wilson Paiyo, Max Avege na Jerry Nakatu i no lukaut gut ol wan-

tok Okapa bilong Eels bai opim ai bilong ol wantaim ol strongpela ran bilong ol long brukim difens.

Tasol sapos Eels i laik win, ol i mas yusim gut Eddie Mark long beklain husat i gat planti kain kain trik long kamapim ol liklik spes bilong

putim trai. Hawks i mas yusim gut kik pilai bilong Ume Oa long wokim ol birua bilong ol long-long.

Dispela bai wanpela strongpela gem na husat tim i no wokim planti asua bai kisim 1991 SPM Cup

Winfield League Results

Kangaroos - bai strong moa

JIM Jacobi, president bilong PNGFRL i tok aut olsem ol Australian Kangaroo ragbi lig tim bai kam long Papua Niugini bihain long dispela mun long pilaim PNG Kumuls.

Em i tok dispela wokabaut bilong ol Kangaroo em Winfield i sponsarim olsem na nem bilong ol bai Winfield Kangaroo. Ol Kangaroo bai go lukluk na pilaim ol tim long ol bikpela sentas long kantri.

Raun bilong ol Kangaroo bai stap olsem:

Fonde, 26th Sept. Kamap long Lae
 Satude, 29th Sept. vs Noten Son
 Mande, 30th Sept. Kamap long Rabaul
 Trinde, 2nd Oct. vs Ailan Son
 Fonde, 3rd Oct. Kamap long Goroka


Sande, 6th Oct. vs Papua New Guinea - Tes 1
 Mande, 7th Oct. Kamap long Mt Hagen
 Trinde, 9th Oct. vs Hailans Son
 Fonde, 10th Oct. Kamap

long Pot Mosbi
 Sande, 13th Oct. vs Papua New Guinea - Tes 2
 Tunde, 15th Oct. Go bek long Australia.

Sir James i tok Australia bai salim strongpela skwat na bai ol pilaim dispela ol pilai bilong ol olsem taim ol i bin go wokabaut na pilai long Englen las yia.

Ol tripela son na ol Winfield Kumuls bai i gat planti taim long redi long kamapim gutpela gem egensim ol sempion ragbi lig tim long wol.

WELKAM KANGAROOS



Winfield pulim planti sapot

PRESIDEN bilong Papua Niugini Ragbi Futbal Lig Sir James Jacobi i givim bikpela toktok amamas i go long Winfield Kampani long kamapim gutpela wok long pinisim dispela sisen bilong Winfield lig.

"Long stat bilong sisen Winfield i bin soim olsem em i gat stronpela tingting long helpim na strongim ragbi long ol liklik senta. Kampani tu i wok long mekim ol man i luksave long dispela spot taim em i wok bung wantaim ol niuspepa, TV na radio long kisim planti manmeri i kam lukim pilai ragbi. Dispela i wokim na lukim ol pilai na givim mani i go long ol lig asosiesen."

Jacobi i tok wok bung bilong Winfield Ragbi Lig Infomesen Sevis wantaim *Post Courier*, *Wantok*, *PNG Times* na *Weekend Sport* i karim kaikai long kisim ol nius bilong pilai long wan wan centre insait long kantri.

Dispela wok bung i kamapim ol kain infomesen olsem dro, skoa na ol liklik stori bilong ol pilai i kamap long ol wan wan Winfield lig senta in kamap long radio, TV na ol niuspepa.

"Planti ol pipel i luksave long ragbi lig long ol wok bilong EMTV long givim nius long olgeta wik na wok bilong *Radio Kalang* long givim forpela aua bilong Ragbi Lig tokbek so wantaim Big Murf, Ray Stuart na Jack Metta."

"Long hap bilong ol pilaia, awod bilong "best and fairest" long olgeta week long pilai i bin helpim ol wan wan pilaia long pilai strong na kamapim gutpela stall."

"Long olgeta dispela hat wok bilong wantaim *Post Courier*, *Wantok*, *PNG Times* na *Weekend Sport* i save kamap long pilai na long ol sampela riji ol i bin kisim gut bekim long ol mani ol pipel i save baim long lukim pilai."

Jacko i redi long raun long PNG

PETER Jackson i bin putim kamap gutpela gem egensim Penrith Panthers tasol Panthers i daunim tim bilong em Norths long ai bilong ol sapota bilong em.

Bihain long bikpela gem namel long Penrith na Norths, Jackson i go insait long rum bilong senis na dokta i givim marasin long lukautim em long sik taipod taim em i kam long pilai long Papua Niugini.

Australia Winfield Kangaroo bai pilai raun long Papua Niugini stat long Sarere 26 Septemba. Em i wanpela bilong ol pilaia husat i kisim marasin bilong sik taipod. Bikos ol selekta i makim pinis fainal tim bilong pilai egensim Papua Niugini long dispela yia.

"Mi no pilim gutpela," Jackson i tok, taim em i stap insait long rum bilong senis. "Dispela marasin i kikim mi stret" na rot we mipela i lusim gem long Penrith i no stapim dispela hevi.

Taim mipela abrusim las penelti gol em i no stretim hevi bilong mi. Bikos mi ting olsem bai mipela i winim dispela gem, sapos mipela i dro na pilai long sampela moa taim.

Norths i bin bungim het wantaim na kamap long mesa semi fainal tasol em i lusim dispela gem long han bilong Canberra Raiders 12-16. Norths i lusim dispela gem long Panrith tasol Jackson i bin wanpela 2KY awad bikos em i wanpela gutpela pilaia.

Jackson i bin kisim hevi long leg bilong em. Na em i no pilaim sampela gem bilong sisen. Tasol taim bilong fainal em i soim ol selekta na ol i makim em long kisim ples bilong Wally Lewis long pilaim Papua Niugini Kumul long Septemba.

Jackson i bin pilai gut long tupela fainal gem. Long faiv et na senta posisen. Na tu em i bin setim David Hall long putim wanpela trai egensim Panrith long maina semi fainal. Tasol Panrith i kamap wina long dispela gem.



Peter 'Jacko' Jackson i givin toktok long ol bol Norths long strongim pilai bilong ol. I luk olsem Jacko bai kam long PNG olsem faiv et bilong Winfield Kangaroo.

Program bilong wokabaut bilong ol Kangaroo

AUSTRALIA Winfield Kangaroo bai i kam long Papua Niugini. Insait long wokabaut bilong Kangaroo ol bai lukim kain kain pasin tumbuna bilong Papua Niugini.

Ol bai lukim samting olsem long:

LAE:
 Kaiseler grup.
 Kaikai na danis.
Golf.
 Raun long bot i go long Salamaua long pilai snuka na lukluk raun long bikpela fam bilong pukpuk long Sauten rijin.

RABAUL:
 Kaiseler grup.
Golf.
 Raun long sip i go long Pidgeon Ailan long pilai snoka.

GOROKA:
 Amamasim kamap bilong Winfield Kangaroo long Goroka.
 Asoro Mudman na 9-pela singsing grup.
 Raun Raun Tiata Grup.
Golf.

HAGEN:
 Belo kaikai bilong ol spotma.
 Lukluk raun i go long haus poroman.
Golf.
 Kaiseler grup.
 Lukluk raun i go long kopi na ti

plantasin.
MOSBI:
 Kaiseler grup.
 Belo kaikai.
 Winfield Dina kaikai bilong Sir James Jacobi Awod.
LUKLUK RAUN LONG OLGETA SKUL:
 Insait long wokabaut bilong Kangaroo ol pilaia bai lukluk raun long olgeta skul na putim kamap kosa klinik bilong ol yangpela manki husat bai kamap Kumul pilaia long bihain taim.

OL REFERI HUSAT BAI LUKAUTIM INSAIT TAIM OL KANGAROO I KAMAP LONG PILAI:

Noten Son - Tom Peles.
 Ailan Son - Graham Ainui.
 Namba wan tes pilai - Dennis Hale.
 Hailans Son - Moses Tolingling.
 Namba tu tes pilai - Dennis Hale.
 Dennis Hale em i namba wan refri long Nu Silan. Na em i bin lukautim planti intanesenel gem pinis. Na em i laikim long lukautim gem bilong Winfield Kumul Tes long kisim sampela moa save.


WINFIELD LIG:
 Sir James Jacobi i amamas bikos Winfield Kampani i sponsarim ragbi lig insait long Papua Niugini stat long dispela yia, 1991.

Winfield Kampani i bin kamapim na helpim ragbi lig long ples pastim long taun. Planti toktok na amamas i kamap long dispela taim. Olsem na pulim planti manmeri long lukim gem. Dispela em i olsem wanpela



bikpela win bilong Kampani. Namba tu samting kampani i laikim long bringim planti manmeri i go insait long lukim ragbi lig. Na tu helpim long bringim moa mani bilong lukautim ragbi lig.

"Nau mipela lukim olsem" Winfield Ragbi Lig Infomesen Sevis i kamapim bikpela aweanes kempen. Dispela i kamap long ol media olsem *Times* na *Wantok Niuspepa*, *Post Courier*, *Weekend Sports*,



Bik nem pilaia long wol na kepten bilong Winfield Kangaroo Mal Meninga.

SYDNEY WINFIELD KAP

Gren Fainal
Penrith Panthers
 VS
Canberra Raiders

Making the big game bigger



Hawks i strong moa yet

VANIMO

FELIX RAMRAM i raitim

MOA long 3,000 manmeri long Vanimo i kamap long Peter Cole Oval long lukim gran fainal gem namel long Hawks na Tigers. Dispela pilal i kamap long Sande 15 Septemba. Presiden bilong Vanimo Ragbi Lig i askim provinsal edukesen minista Crolus Yuni long opim gem long 3 klok aplinun. Tigers

I kamapim gutpela na strong-pela gem long namba wan hap tasol ol olupela pilala bilong Hawks i putim strongpela banis egensim Tigers. John Mbiak, Jessy Kairu na Patrick Ruben bilong Hawks i holim pasim gut ol yangpela pilala bilong Tigers long putim moa trai long namba wan hap. Hawks i kamapim kain pilal olsem bihain long em i ritim gem bilong Tigers long pes 15 minit. Ol pilala bilong Hawks i strongim beklain. Rait winga,

Thomas Issuran i putim namba wan trai. Sampela minit bihain long dispela trai ausait senta, Patrick Ruben i putim namba tu trai long bringim skoa i goap long 10-0. Tupela brata, Phillip na Jessy Kairu i helpim long putim wan wan trai long bringim skoa bilong Hawks long namba wan hap i goap moa long 24 poin pastaim long hap talm. Kepten John Maleni na ol arapela pilala Tigers olsem faiv et Ajax Okaria, lep winga Kebu Warawe

na ausait senta Gilman Russel i bin traim hat long putim trai. Tasol olgeta hat wok i pinis nating bikos Hawks i putim strongpela banis. Bikpela hevi i stap long ol fowad pilala bikos ol i no holim gut ol pilala bilong Hawks. Olsem na Hawks i gat planti sans long putim moa trai long pes hap ya. Bihain long hap talm Tigers i putim kamap strongpela banis. Na i stapim Hawks long putim moa trai. Alienman bilong

Tigers Job Temur i putim tupela trai long helpim bringim skoa i goap. Kik bilong dispela trai i go insait na narapela i abrus. Dispela i bringim skoa bilong Tigers i goap long 12-30 poin long ful talm. Nau yet ol eksekutiv bilong Vanimo Ragbi Lig i no stretim prais bilong givim aut long wan wan pilal na tim. Olsem na ol eksekutiv bai tokaut long Redio Sandaun long bihain talm.

Win!
Win!
Win!

Winim Fri Tiket bilong lukim

AUSTRALIA KANGAROO Vs PNG KUMULS

long: 6 Oktoba long GOROKA
13 Oktoba long MOSBI

HARIAP NAU! NO GAT PLANTI TIKET! Yu gat moa sans bilong win sapos yu salim moa pas i kam. Las de em long 1 Oktoba, 1991.

Bekim dispela askim: • Long wanem yia i go pinis em Australia Kangaroo i bin kam raun long Papua Niugini?

Ol sponsa helpim gut Lae ragbi lig

LAE

BIKPELA developmen i kamap long Lae Ragbi Lig Oval long dispela yia. Eksekutiv Opisa bilong Lae Winfield Lig Addie Bal i tok planti kampani i givim han long helpim putim toksave long fil long helpim Winfield Kampani. Ol narapela helpim i kam long ol kampani olsem Westpac Bank, BHP Lysaght, CIG kampani, NGI Steel, na Coca Cola kampani i givim bikpela helpim long bringim kamap ragbi lig insait long Lae. Westpac Bank i helpim long putim mani long Mid Wik resis. Dispela em i namba wan taim wanpela resis olsem kamap long Lae. Bal i tok dispela Mid Wik resis i helpim planti yangpela pilala long lainim nupela stail bilong ragbi lig. BHP Lysaght i helpim long putim mani long pri sisen resis. Na tu Lae Bombers long intasiti resis. Dispela yia Coca Cola i helpim long sponsarim Lae junia long egensim ol narapela senta. Bal i tok olgeta dispela mani i helpim planti yangpela pilala long bringim stail bilong gem i goap. Ol man i helpim ol yangpela pilala olsem Thomas Daki. Daki i bin pilai long junia kumul long 1986 na 1987. Dispela olgeta mani i helpim em long kamap gutpela na kisim nem long pilai insait long Lae Bombers. Na tu Papua Niugini Kumuls egensim Frans long dispela yia. Ol narapela yangpela pilala husat i stap long skwat long Lae Bombers sait na Noten Son em; Jacob Danny (Noten Son na Lae Bombers), Charlie Vee (Noten Son) David Glipu (Noten Son), John Pil (Noten Son), Nadi Yarl (Noten Son) na Kerry Gawi (Noten Son). Bal i tok taim Winfield kampani i kamap olsem mesa sponsa bilong ragbi lig, planti kampani i givim helpim long ol narapela samting long apim nem bilong ragbi lig tu. Planti i helpim long putim toksave long ol niuspepa, redio na TV. Kampani olsem ICI Dulux i helpim long givim pen long stretim kala bilong gransten na opis bilong Lae Lig Oval. Dispela yia em i wanpela gutpela yia bilong Lae Lig bikos Winfield Kampani i putim mani long ragbi lig long olgeta senta. Na dispela helpim planti yangpela pilala long bringim stail bilong gem i goap na pilai long ol narapela nesanel na intanesanel gem. Bal i tok Lae Ragbi Oval i stap long gutpela nau bilong nesanel na intanesanel gem. Na em i gat bikpela bilip olsem ol dispela pilala bilong Noten Son; (Madang) Joe Tonar, Chris Sari, Dick Moiga, Tweedy Malagian, Elison Ketavo, Lance Tivara, (Wau/Bulolo) Sione Kafusi, David Buko, (Lae) Thomas Daki, John Markham, Goro Arigae, Mathias Kin, Matthew Elara, Ngala Lapan, Korul Sinemau, Raymon Karl, Jacob Danny, Charlie Vee na John Bob bai putim kamap gutpela gem egensim Winfield Kangaroo long Sande 29 Septemba, 1991.

Name: Year 19.....

Address:.....

Telephone No.:.....

Tok save olsem ol wokman na meri bilong Word Publishing na ol famili memba bilong ol i no inap resis.

Salim ansa wantaim nem, adres na telipon namba bilong yu i kam long:
Wantok Ragbi Resis, P.O. Box 1982, Boroko, N.C.D.



Winfield Cup


GRAND FINAL LIVE



BROUGHT TO YOU BY EM TV

SUNDAY AFTERNOON 22nd SEPT.

Billy bilong Wallangarra i kamap olsem 'Junior'



Potocopi bilong Wayne Pearce

□ Olgeta samting Billy Moore i mekim em i olsem olpela biknem pilaia bilong Balmain Tigers na Kangaroo Wayne Pearce. Tupela wantaim i save pilaim sem posisen na i gat wankain pasin tambu long ol kaikai na drin. I luk olsem Billy bai kamap olsem nupela Wayne Pearce bilong Australia.

WAYNE Pearce i no dring, smok, putim gutpela klos na tu em i no kaikai gut. Olgeta taim bilong em i yusim long trening.

Pearce i yusim het bilong em taim em i pilai wantaim Balmain. Na dispela pilai i stapim posisen na wok bilong em. Planti gutpela pilaia i putim olgeta taim na wok long bringim we bilong pilai bilong ragbi lig i goap. Tasol wanpela pilaia i no wokim kain pasin olsem Pearce.

Nau yet Billy Moore i wanpela long ol lain husat i stapim pinis olgeta samting na wokim trening tasol. Planti man i harim olsem dispela pilaia i kamapim kain pasin olsem. Na tu lainim ol sain bilong spots.

Em i bin pilai lok bilong Norths. Planti man i bin tok olsem Moore em i nupela Pearce bilong 1990 na 1991. Narapela yangpela pilaia husat i gat 21 krismas tasol pilai anda 21 na risev gret bilong Norths. Em i wok olsem wanpela niusman long Sentrel Kos.

Planti askim i bin kamap long raitim stori long wanpela yangpela pilaia. Tasol bikpela hevi kamap bikos Paul, husat i bin givim stori long dispela pilaia i no save gut long em.

Em i raitim tasol wanem samting em save wokim long laip bilong em. Paul i raitim, planti taim dispela pilaia i trening gut wantaim Pat Jarvis. Na tu olgeta taim toktok wantaim em.

Na em i go moa na raitim, taim em i brukim wisket bilong em, em i go stap long haus sik. Na bihain em i go bek gen long wokim trening gen. Taim bilong ran tu olgeta taim em bai traim long winim husat ol man ran wantaim em.

Planti taim em i no save spit tasol em bai traim long abrusim ol man sapos ol man i ran abrusim em. Las yia 1990 wanpela resis bilong 2600 mita i kamap na Billy i ran abrusim olgeta man na givim siksti i go pamim waiya banis ausait long fil.

Billy em i gutpela man. Em i save long laik stap gut wantaim olgeta man. Billy i pren gut wantaim prop Jarvis, olsem na nau em i stap insait long Johnny Lewis Boxing jimnesim long Nutaun.

Lewis yet i tok olsem i no gat man bai winim dispela yangpela pilaia, Billy. Dispela yangpela pilaia i gutpela long olgeta samting. "Wanpela taim mitupela i wokim trening na Billy i askim mi. Yu bilong wanem hap bilong Australia", Moore i tok. Moore i lap na bihain i tok olsem em bilong boda bilong Kwinlans na Nu Saut Wels.

Na Billy i askim, "Yu no bilong Wallangarra"? Mi ting i no gat man i save long ples bilong em. Tasol Billy i save bikos papa bilong em i bin ami opisa long dispela hap.


Taim mama bilong em i gat bel long Billy, em i kam long Sidni na karim pinis na bihain em i go bek stap long Wallangarra.

Moore i bin lusim Wallangarra na joinim Norths long 1989 sisen. Em i pilai risev gret long dispela taim na ol i lusim gren fainal.

Na hevi bilong bodi i goap long 91 kilogram pastaim long em i gat 71 kilogram. Bikos em i kaikai planti na tu wokim planti trening. Billy i amamas long planti man i makim em olsem Wayne Pearce. Billi i tok olgeta taim em i lukluk long Pearce. Na i gat bikpela bilip long wanpela taim kamap olsem em.

Gutpela olgeta man i toktok olsem tasol mi laikim mi yet olsem Billy Moore. Billy nau i stadi long Sains long Sidni Yunivesiti long painim aut wanem samting i kamap long bodi bilong em long olgeta Sande moning.

Billy bai graduat long Belsela Ov Sains bihain long dispela yia. Nau yet Billy i tok em i laikim stap long Not Sidni tim. Bikos tim i bin givim em gutpela skul long kamap wanpela gutpela pilaia nau long Sidni Lig.



□ Pat Jarvis

Winfield League '91

SIPAK MAIK

INSAIT LONG BALUS EA HOSTESS I STRETIM OL PASINDIA!!!

GLENDIA KIRAP NA HATIM HENRI,, EM HATIM EM ISI TRU!!!

HENRI PINISIM WISKI NA EM SINGAUT LONG RIFILIM NUPELA,,



BIHAIN LIKLIK NA PISPIS KILIM EM STRET... EM GO LONG TOILET..

LONG DISPELA TAIM BALUS I GO INSAIT KLAUT...

BALUS I BAM I GO IKAM NA HENRI PUNDAUN ANTAP LONG WANPELA LAPUN MERI...



PERSONAL LOANS

Husat i halivim yu long kisim ol samting yu laikim tru?

Sapos yu laikim nupela ka o ol samting bilong haus, PNGBC ken givim yu dinau long baim ol dispela samting.

Yu mas gat gutpela wok na sampela seving long haus moni. Na i no hat tumas long bekim dispela dinau.

Askim long haus moni bilong PNGBC. Bai mipela halivim yu long kisim ol samting yu laikim - emi tru!



REBO

OL POLIS I KAM LUKIM OL NA STOPIM KA KLOSTU LONG OL...

HEY, YUPELA MEKIM WANEM LONG HIA, A? GO LONG HAUS!

KAMON, BOS.. MIPELA SIN-DAUN TASOL!

EMNACI! RAUN TASOL!

TAIM OL POLIS I LUSIM OL, OL I TANIM NA PAINIM REBO... TASOL EM LUS PINIS...

HEY, MAN YA I GO WE? BIARI G*?!?

MASKI!! YUMI WETIM EM LONG APINUN.. YUMI GO!

NAU LONG APINUN TRU REBO RONI KAM BEK... TUPELA RASKOL I SAMBAI NA WETIM EM...

EM TASOL!

TUPELA KIRAP NA PASIM REBO LONG ROT...

HEY, YU! YU TASOL PAITIM TUPELA PORO BILONG MIPELA NA SALIM OL I GO KALABUS, A?

PAITIM EM! EM HUSATE

NAU RASKOL YA I RAUSIM POKET NAIP NA LAIK SUTIM REBO... REBO KIRAP NOGUT

YU G*?!? BAI MI BEKIM DINAU! YU BAI PINIS TETE!!

PUTIM NAIP I GO BEK! YUSIM HAN, KAMON!

KILIM EM!

EM SUBIM NAIP I GO LONG REBO, TASOL REBO I KALAP I GO BEK...

SANAP!! NAU YU PRET A? SANAP!

HEIII!! ISI, YA!!

SWOOSH!

OL SAVEMAN BILONG BISNIS YUSIM OL!

Lister

LTI 5 K.V.A.
 ● TOTALLY PORTABLE ENERGY SOURCE
 ● IDEAL UNIT FOR VILLAGE LOCATIONS

TS2 8.5 K.V.A.
 ● 3 PHASE OR SINGLE PHASE POWER
 ● COMPACT AND EFFICIENT

HR3 26.25 K.V.A.
 ● IDEAL COMMERCIAL BACKUP SYSTEM

CS6 58 K.V.A.
 ● INDUSTRIAL CAPACITY
 ● WILL HANDLE MAXIMUM DEMAND FOR POWER ANYTIME

Brian Bell Stores

● BOROKO — 25 5411
 ● LAE — 42 377
 ● GOROKA — 72 1098

● MT. HAGEN — 52 1999
 ● RABAUL — 92 1966

Phantom



Flash Gordon



MICKY MOUSE




GAS

The energy of the future

- EFFICIENT
- INSTANT CONTROL
- CLEAN
- SAFE

Variable Uses

- BAKERIES
- RESTAURANTS
- INDUSTRIES
- HOME COOKING



GUINEA GAS FOR PNG
BORAL GAS (PNG) PTY LTD

Pom	Lae	Hagen	Wewak	Rabaul
21 4248	42 2574	55 1216	86 2125	92 1225

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.